



四佳集
十四

補遺
詩

~16
2415
14

廿十八



和
2415
18-14



四佳詩集補遺一

詩類 東文選

雪

禪家初喜皎然至詩壘還逢白也來羞作顛狂春
後絮相從淡薄臘前梅


小雨

朝來小雨更蕪穢落絮飛花滿一簾九十日春今
已暮病餘杯酒懶重拈

麻浦夜雨

百年身世政悠悠夜雨江湖惹起愁袖裏歸田曾
有賦已拚終老白鷗洲

即事



四佳詩集補遺一

小沼如盆水淺清菰蒲新長荻芽生呼兒為引連
筒去養得芭蕉聽雨聲

次尹洪州梅花詩韻兼柬吳君子

梅花如雪雪如梅白雪前頭梅正開如是乾坤一
清氣也須踏雪看花來

春日

金入垂楊玉謝梅小池新水碧於苔春愁春興誰
深淺燕子不來花未開

即事

十年面長瘦一月頭不梳久病兼新病閑居類隱
居園廬供藥酒點筆寫方書信信經營拙仍知故
舊踈

獨坐

獨坐無來客空庭雨氣昏魚搖荷葉動鵲踏樹梢
翻琴潤絃猶響爐寒火尚存泥途妨出入終日可
關門

小雨

小雨塵殘暑涼颯動古枝破窓時見月老僻半題
詩逢旅少親舊人生多別離如何連曉夢未有不
歸時

七夕

天上神仙會年年此日同一宵能有幾萬古亦無
窮月色蛩音外河聲鵲影中雖無文乞巧得句語
還工

三田渡道中

羸馬三田渡西風吹帽斜
澄江涵去鴈落日送還鴉
古樹明黃葉孤村見白沙
青山將盡處遙認是吾家

夜詠

扶病坐無寐蕭蕭雪鬢殘
茶聲喧小鼎燈影照殘缸
月穿簾入室風撼紙號窓
飽閱人間事閑愁自滿腔

送昌原府使

憶昔重過月影臺
檜山依舊翠成堆
高吟落日欲將去
為喚孤雲猶不來
滄海有潮環古壘
短碑無字半荒苔
風流太守仍文雅
為我閑登酌一杯

誕辰賀禮後作

誕辰陳賀紫宸朝
稽顙瑤墀拜赭袍
金甕初開千日酒
玉盤齊獻萬年桃
竒逢幸際雲龍會
霈澤深涵雨露饒
醉飽小臣賡大雅
更申華祝頌唐堯

少日

少日豪談奮兩髯
年來斂鍔遠人嫌
從前宦路羊腸險
抵老才名鼠尾尖
詩不驚人吟又改
酒能忘我醉還添
欲書折簡招棊伴
凍筆如錐不可拈

扶安

十載東西信轉蓬
登樓聊喜使君同
雨聲長在芭蕉葉
春色深留芍藥叢
身世已拚杯酒裏
光陰空費路岐中
醉餘猶記江南夢
萬柄荷花十里紅

李監司 鐵堅 贈黃山谷集

元豐太史筆如椽第一江西正派傳句法能追杜
陵後詩名或在蘓老前生平鑄錯緣文字身後流
芳足簡編謫宦東西三十載黔南雲物夢潛然

龍鍾

天地龍鍾一病翁岸巾危坐小窓中黑雲暗淡葡
萄雨紅霧霏微菡萏風燕語自能知主客蛙鳴元
不管私公了無官事眠初覺只把詩聯課小童

諸富別墅將開遣僮奴起功

中年好道晚當歸卜地山中頗自竒豈有行窩追
邵老當營別墅擬王維石田有種宜供稅草屋無
人為寄貲寄語卜鄰諸野老他時爭席我為誰

三月三日題示金子固

春江初漲碧於藍花柳芳菲日色酣我在百年今
半百時當三月正初三右軍筆妙曾修禊工部詩
豪欲典衫今古風流人物在又逢佳節思何堪

夏日即事

小晴簾幙日暉暉短帽輕衫暑氣微解籜有心因
雨長落花無力受風飛久拚翰墨藏名姓已厭簪
纓惹是非寶鴨香殘初睡覺客曾來少燕頻歸

漫成

紅塵騎馬十年忙一日偷閑趣亦長卯酒醺人聊
復醉午風吹袖欲生涼脫巾散髮從人笑索紙題
詩作意狂却勝前時衙罷去青衫濕盡汗翻漿

七月七日

迢迢銀漢鵲橋通天上神仙此會同
牛渚波寒三夜月鳳機梭冷五更風
蛛絲乞巧吾無與鶴駕登仙事已空
曝腹庭前聊復爾乘槎何路問張公

朝坐

小窓扶坐倚烏床瘦骨如峯髮似霜
多病已嘗藥遍恟涼猶復攬衣忙
蕪菁細切青蔬軟蕙苴新炊白粥
香萬事不如眠食穩何須苦覓養生方

送洪節度伯涓之鎮

將門生將早箕裘萬里青雲得意秋
花縣憶曾留異蹟柳營今復運良籌
氣雄虎旅三千隊令肅龍驤萬斛舟
南顧君王寬聖慮姓名從此入金甌

試院曉坐

試院深深夜未朝玉堂學士盡英豪
庭中似海燒紅燭門外如雲立白袍
空北驂騮誰俊逸圖南鵬鳥已扶搖
天公許我分仙桂說與諸生着力高

南至後二日入清齋寄子深

老病情懷已索然青銅曉攬感流年
日南至後初添線風北來時欲折綿
紙帳遮寒成獨坐木爐偷煖穩長眠
詩家風味依然在喚取龍團雪水煎

用安陰詩韻

百歲光陰晴復陰當頭細事怕臨深
一生踈懶糴中散萬古風流李翰林
老病尊前花翳眼功名鏡裏雪盈頭
十年空草歸來賦何用區區學越吟

長夏

長夏深園瓦屋低官閑心跡似幽棲客稀門巷堪
羅雀兒戲庭除政闕鷄永日鳴琴尋舊譜小窓分
紙寫新題綠陰驀地門長掩留與嬌鶯自在啼

題玄旭上人詩卷

我嘗坐東窓旭日來臨之明光不容瞥忽此西飛
暉窓明復窓暗不知誰所為師看變化相種種亦
如斯明暗當復還汝問汝祖師

七月十九日夜始陰雲三更小雨自四更大
風五更而止樹木盡拔屋廬皆毀京城飛瓦
積如山丘百草百穀大半枯損風變之異近
古所無今年自正月不雨至于四月赤地千

里五月大雨水患不可勝言六月又旱七月
之初又暴雨至今日大風一年之內大旱大
雨大風災變重重天之譴告深矣是用悲傷
作詩以誌

大雨尚可言燥者蒙其利大旱尚可言濕者受其
賜大風不可言百物盡憔悴如何一年內三灾同
荐至三歎復三歎是用詩以誌

月影臺

月影臺前月長在月影臺上人已去孤雲騎鯨飛
上天白雲渺渺尋無處孤雲孤雲真儒仙天下四
海聲名傳高駢幕下客如織才氣穎脫黃巢檄顧
雲學士詩告別文章感動中華國東還時運何崎

嘔鷄林黃葉寒颼颼英雄失志知何為永與綺皓
相追隨伽椰山中巖鳴湍海雲臺上騎笙鸞江南
山水牢籠畢江南風月無閑日一自孤雲去不還
萬古自如唯江山今人空自說孤雲幾人得見孤
雲墳飛昇已作上界仙桑田滄海今千春我來舉
酒酌西風欲喚孤雲一笑同摩挲短碣立斜陽孤
雲不來空斷腸

醉歌行

鳧何苦短鶴何長蚘何有餘夔不足物理由來自
不齊天公天公多戲劇折長補短我無術損之益
之我無策夷齊餓天弓盜跖壽富秦隋暴興兮鄒
魯窮阮仁未必壽德未必福善未必福老蒼
默默懸在上我胡為乎徒惻惻劉伯倫賀季真古
來賢達推第一但愛醇醪不離口世間萬事皆外
物功名富貴皆筌蹄生死醉鄉能事畢君不見四
佳老人性本愚是非善惡都不別有酒即飲無則
沽日醉嗚嗚雙耳熱兩鬢胡為白如雪

尊菜歌

尊菜生南國野老勤採得持以贈故人色味俱絕
特滑復滑細復細輕於絲潤於酪我本藜藿腸平
生嗜淡薄物性與我合所以愛之酷或以為膾或
為羹鹽豉始和椒桂馨金齏玉糝何足論異味不
羨五侯鯖江南山水天氣早三月四月亦堪討至
今六月老軟羨不待秋風歸去好老夫晚年口業

增悵望江南歸不能歸不能可如何頭白長愧張
季鷹

安堅萬壑爭流圖

安堅筆法天下無磅礴一掃水墨圖中有萬里山
嵯峨元氣曠蕩青模糊秋風策策霜葉殘山骨盡
露呈峯巒遙看萬壑明可數飛泉幾道鳴潺湲奔
崖觸石灑峭壁跳珠散玉噴似雪穿林捎雲走水
未雷霆迅閃箭一換壯或震掉聲喧逐萬騎蹙踏
從西來細或涓滴鳴琮琤五絃清越餘音哀或如
玉虹插長空或如銀漢橫天中平鋪或見生錦縠
勢激有時成銀峯山下交流深幾尺俯視澄澄鴨
頭綠其環無際下無底明可為鑑清可啜安得變

作葡萄酒一飲健倒三百杯滌我十載紅塵蹤弱
水清淺尋蓬萊君不見昔時風流李太白來遊匡
廬看飛瀑好句長留天地間一洗徐凝詩拙惡我
今見圖開心昏詞源欲倒三峽源詩成且莫高聲
吟泓下老龍應驚塊

古意

海底珊瑚高幾丈千年試作千尋網萬牛挽出滄
海深蛟龍鼉鬣霹靂響搏桑日出紅濤熱光芒照
耀黃金闕平生季倫麤男兒一擊破碎紛似雪紛
似雪不足惜從此至寶無顏色

七月既望不泛舟翫月悵然有作

七月既望月當白 欲泛舟擬赤壁造物小兒多

戲劇年來於我苦相逼廣津水漲不可渡泥深馬
滑箭郊路出門悵望入門愁奈此昏陰天又雨天
上有月知樂秋赤壁之水萬古流天為蘇仙有此
夕江流月白仍泛舟當時豪氣蓋乾坤一賦膾炙
今仍存有舟不泛月不賞慷慨我欲戕天闔天心
予奪不可知世間萬事多參差負舟負月吾柰何
兩鬢颯爽生涼颺

漢都十詠

藏義尋僧

三峯亭亭削寒玉前朝古寺多八百古木回巖樓
閣重鳴川激激山石裂我昔尋僧一歸去夜闌明
月共軟語曉鐘一聲發深省白雲滿地不知處

濟川詠月

秋光萬頃琉璃靜盡棟珠簾蘸寒影長空無雲淨
如掃坐待月出黃金餅乾坤清氣骨已徹朋光一
一數毛髮午夜深深更奇絕倚遍欄干十二曲

盤松送客

故人別我歌遠遊何以送之雙銀甌都門楊柳不
堪折芳草有恨何時休去年今年長參商富別貧
別皆銷腸陽關三疊歌既闕東雲北樹俱茫茫

楊花踏雪

北風捲地萬籟響江頭雪片大於掌茫茫銀界無
人蹤玉山倚空千萬丈我時騎驢帽如屋銀花眩
眼髮豎竹歸來沽酒青樓飲醉傍寒梅訪消息

木覓賞花

尺五城南山正高，攀緣十二青雲橋。華山插立玉芙蓉，漢江染出金葡萄。長安萬家百花塢，樓臺隱映紅似雨。青春來賞能幾何，白日正長催羯鼓。

箭郊尋芳

平郊如掌草如茵，晴日暖風濃殺人。朝來沽酒典青衫，三三五五尋芳春。飛觴轉急流水曲，清尊易枯長鯨吸。歸來駿馬踏銀蟾，玉笛聲殘杏花落。

麻浦泛舟

西湖濃抹如西施，桃花細雨生綠漪。蕩槳歸來水半篙，日暮無人歌竹枝。二山隱隱金鰲頭，漢江歷歷鸚鵡洲。夷猶不見一黃鶴，飛來忽有雙白鷗。

興德賞花

招提金碧照水底，荷花初開淨如洗。霏霏紅霧拂瓊欄，香風欲動翻袖紵。有時碧筒飲無數，白日高談揮玉麈。居僧挽手待明月，小樓一夜涼似雨。

鍾街觀燈

長安城中百萬家，一夜燃燈明似霞。三千世界珊瑚樹，二十四橋芙蓉花。東街西市白如晝，兒童驚走疾於欵星斗。闌干爛不收黃金樓，前催曉考。

立石釣魚

溪邊怪石如人立，秋水玲瓏照寒碧。把釣歸來籍綠蕪，百尺銀絲金鯉躍。細斫為膾燻為羹，沙頭屢卧雙玉瓶。醉來鼓脚歌滄浪，不用萬古麒麟名。

四佳詩集補遺

詩類 丁未手藁

七月六日有雨

銀河清淺月低徊
烏鵲橋成鶴駕催
明日星官應邂逅
不須帝作雨聲來

聒耳

長林蟬噪又啼鴉
蛩語時還亂吠蛙
苦厭幽居爭聒耳
世間無地不喧譁

夜詠

黯黯孤燈已半宵
滿窓風雨響松濤
分明記得江湖興
白鳥滄波漲幾篙

七夕

一年一會已嫌遲有底相逢即別離
洒淚翻成今日雨也應惆悵隔年期
虛傳博望支機石堪笑宗元乞巧絲
銀燭畫屏秋色冷高吟更憶枚之詩

貧家

貧家生理未全踈懶學陶朱養得魚
惡喚童奴鋤菜圃豆花籬落雨晴初

閑中

淡淡輕風細雨天盆花開落一窓前
細思寸晷無閑暇纔了吟詩又醉眠

次日本釋子七人題陳負外杏林亭詩軸韻
花開花謝一園中陣陣奇香剗地風自信栽培曾

得地日邊長得倚雲紅
樹密花稠子亦多君家日用定如何似聞歲收三千斛
乞藥多時許客過嘉樹敷榮倚化工清遊都屬主人翁
桃源風景依然是春色長留院落中
瓊林金杏是誰家菩薩粘枝護晚霞昨夜香風吹
兩浥一時開遍無數花
食實嚼花腹五倉栽種不必學劉郎藥爐文武丹
應熟已喜仙劑擁鼻香
杏林依舊一矐仙種林何須滿石田醫國醫民曾
有手濟生餘澤浩無邊
錦坊千杏是君家底用採蓮向若耶想得枝頭春

意閒若為歸去飽看花

曉吟

短屏孤枕一殘缸
茶椀香爐復酒缸
困睡不知天欲曙
月斜梧影可西窓

到村家

行到廣津倚晚舡
蹇驢馱病問村田
十年一覺歸來夢
三徑荒涼屋數椽

無題

一簟清涼一扇風
悠悠身世樓中沈
吟遍倚闌干
立秋色先歸玉井桐

讀李白詩

李白騎鯨不復還
明珠萬斛散人間
英雄今古知

多少幾箇詩家見一斑

次日本僧送元鷲詩

日邦千里隔封畿
來往風帆瞥似飛
我欲留禪勤挽袖
山禽何事喚催歸

日出扶桑第幾枝
相尋無路海無涯
如今得見高僧面
訪道時還苦乞詩

閑僧非是囁嚅翁
杯渡重溟被浪風
旅館挑燈盤脚坐
扶桑回首日輪紅

為求千軸萬函經
叱馭蛟龍涉海溟
惆悵相逢即相別
人生聚散似浮萍

一見知師頂有光
熟桑門法又庚桑
蘧蔭十幅高千丈
憑仗秋風返故鄉

四佳詩集補遺
卷一
三
滄海桑田幾變遷兩邦依舊好山川打袍贏得雞
林句莫向天東漫與傳

憂旱

今方五月事三農萬里炎雲日政烘大地煎熬困
爐鼎老天胡乃視夢夢

早甚池水盡涸群魚失所悵然有作

小小方塘水盡枯群魚煦沫自相濡江湖萬里無
窮盡鼎裡浮沉爾可吁

悶雨

火雲萬里熾如爐煮海焦山百物枯欲展平生霖
雨手為分天澤洽寰區

喜雨

雲忽油然雨霈然生成萬類洽陶甄體元真主調
元相青史宜書大有年

櫻梅

含梅爛熟火珠繁摘取盤中味可飡冷似清冰甘
似蜜也能解渴策奇勳

將如村野道中有作

五月江村梅政肥絲絲小雨不沾衣却望吾家看
漸近槿花籬落故依依

初收壟麥稻苗青種豆家家叱犢聲辜負十年歸
去約擬將松菊送餘生

瓦甕新醪熟已香盤蔬滿眼亦堪嘗白頭未償免
裘債屑屑往來有底忙

翠鳥

翠鳥一雙錦作衣池邊刷羽弄清暉誰家鐵笛兩
三弄怕有數聲驚且飛

小院

小院無人月一池荷香脉脉更清奇夜深萬籟俱
岑寂箇是幽人覓句時

盆花

閑花擱擱無數開為有清香遠送來終日倚闌看
不足月明扶杖繞徘徊

夜吟

滿窓明月夜沉沉妻病兒癡獨苦心坐對青奴渾
不睡數聲何處惹寒砧

偶題

世間風味水中鹽老去才名鼠尾尖舉世滔滔皆
肉眼無人知我隱書籤

詠翠鳥

錦翎金鬣耀朝暉紅藕池邊得意飛有底不知湖
海大窺魚空自費心機

詠蠅

說與青蠅爾可憎營營終日竟何能止樊已被詩
人刺拔劍疇非老益增

詠蟻

穴聚群居性自然分行成陣屢移遷力微大樹人
誰撼可笑區區志慕羶

詠蚊

細眇於軀曰黍民喜穿懷袖噬人身自將利觜甘
為毒昏夜潛行似小人

芳棧洞有感

平生曾不信青烏陶郭從來術亦粗自笑吾今坐
此界芳棧洞裏閱山圖

思歸

杜老行藏迥莫齊晚年身世讓東西有田不去何
顏面却怕依違到死迷

昨夢分明到夢村稻畦麥壟接蔬園覺來獨坐翻
惆悵心事何人細討論

野人籬落快新晴舍北舍南打麥聲待我歸時酒

應熟候門稚子亦歡迎

浮世

浮世光陰疾似流堪嗔白雪已渾頭細思心事多
於髮無地能埋萬種愁

黃楊

手種黃楊歲月多飽經霜雪矮條柯
松栢厄縮其於閏月何

决明花

今年六月雨頻來堂下决明花滿開杜老詩中曾
一見為憑醫眼好栽培

小坐

小坐池亭欲落暉荷花如拭雨霏霏無人知我傷

心處悵望犇娥歸不歸

矮帽

矮帽籠頭臂檠杌低頭終日坐前簷
悶眠不覺曠黃暮風滿踈簾月滿潭

曉吟

星斗闌干月欲低西隣頻唱五更雞
擁衾危坐翻惆悵夢裡分明對故妻

久旱小雨喜作

桑林禱雨幾經旬一雨油然澤已淪
大慰雲霓天下望天工造物亦如神

夜詠

麥酒新香一小缸深村閨寂斷人疑
心中不盡平

生事風卷疎簾月滿窓

廣津

廣津津水碧於苔匹馬吾今幾往來
坐對篙工還自笑何曾如汝濟川才

移竹

此君清節我曾知醉日移栽頗得宜
準擬蟠根龍蟄處會看成子鳳鳴時

移蓮

淨友神交自少年極知真性君子賢
莫言才大難為用何物人間大似舡

移菊

由來霜傑性通靈晚節芳心德又馨
泛酒餐英渾

細事百年吾欲制頽齡

移蘭

幽艷貞姿倚國香
歲寒高致飽風霜
世間鼻孔無人嗅
採採吾將紉佩囊

三田渡

樂天亭下路迢遙
行渡三津泛小舸
却認我家來入望
青山窈窕水周遭

奉寄李直講

孟智

兼戲金司成慶孫

司馬聯名五十春
如今存者四三人
功名得失皆身外
絕喜相逢白髮新
金兄曾重司成望
李仲今陞直講班
可笑當時未坐客
謬承知館押同官

屈指交遊半百年
白頭青眼故依然
同時同榜同僚少
何日君家辦勝筵

年來百病交侵日就衰謝悵然有作

為攬青銅鏡
堪悲白雪鬚
人呼肯宰相
自笑豈浮屠
久矣齒曾豁
居然腸已枯
一生空病骨
荏苒歲時徂

煎茶

煎茶坐清晝
石鼎咽春江
竹色搖清簟
槐陰罩小窓
柳深鶯轉百
花叢蝶飛雙
只得閑中趣
無由學隱龐

用前韻

平生愧莘野
何處問桐江
大隱思南郭
高情愛北

窓風流誰第一閑適我無雙人物他時論誰能譬
蜀龐

有感

懶出渾如塵交遊不似前嵇康書已絕徐孺榻空
懸袞袞悲歡地悠悠老壯年人情翻覆手世事已
忘筌

五月

五月陂塘上扶筇步履遲今當竹醉節幾見柳眠
時山影臨桐井花香隔槿籬炎蒸何處避風月足
攀追

送吳度節純次坡平韻

九重分節鉞萬里作干城橫槩開談笑挽河洗甲

兵碧幢曾建策白羽更揚靈細柳閑嘶馬春深驃
騎營

夜雨

蕭蕭夜來雨獨坐聽寒聲冷透琴書潤涼涵枕簟
清無心成小睡不語度殘更念及田家事何當快
盡晴

用前韻

平生甘寂寞永日樂栖遲危帽憑闌處撚髭覓句
時苔徑連花塢槐陰覆竹籬流光空在苒衰病愧
難追

秋日

風光消酷暑雲物動高秋
函蓄香初歇芭蕉葉攸

愁憂來頻攬鏡病後倦登樓無限尊鱸興江湖一葉舟

光陰

光陰何荏苒身世愧依違老欲拋書帙閑思問釣磯殘花經雨盡病葉受風飛搖落悲秋日登樓客未歸

官閑

官閑如致仕心靜似參禪客絕陳蕃榻家無鄭老檀未成南郭隱剩得北窓眠何以消長日莊周內外篇

長夏

長夏苦炎蒸起居亦不能誰言虱堪養自識繩可

憎香鼎添微火茶甌小點冰料頭盤脚坐身世酷如僧

用前韻

一生無事短萬事少全能性懶招人謗家貧免盜憎鄉情濃似粥官興冷於冰草屋如蓮社脩然有髮僧

又用前韻

當時無寸效於世竟何能自信心腸苦人知面目憎文章慙甫白筆法愧斯冰終日坐無語還同入定僧

即事

竹簟身便穩花階步自遲閑猶睡終日喜鵲語移

時翠滴葡萄架香傳枳棘籬莫言生理拙留客有
琴棋

矮屋

矮屋少來往陳徧時卷舒西山已薄日北闕休上
書花竹是知己孟尊能起余功名可止足何不還
故廬

秋日

此日非前日今秋似去秋荷花風色惱桐葉雨聲
愁渺渺山陽笛悠悠王粲樓尊鱸今故好歸興滿
孤舟

屏跡

衰遲甘屏跡恬靜可怡神賓客過經少隣親問訊

頻盤飧殊淡薄藥物自新陳更學安心法殘生養
性真

小榻

小榻因仍坐踈簾寂寞垂樹風飛鳥毳簷雨炯蛛
絲瘦杖携堪愛輕衫睡更宜如何垂老日癖酒又
狂詩

苦雨

雨自連旬苦門長盡日關開窓看綠竹捲箔對青
山蒲劍參差碧苔錢點綴斑 聖恩長許暇身世
更投閑

老屋

老屋身如寄閑眠日抵年簞紋人字細扇樣月輪

圓蔣運常尋竹瀟溪獨愛蓮未成歸隱計空詠卜
居篇

福慶讀書喜作

怜汝能耽讀晨昏不廢吟寸陰當尺璧一字勝籛
金若識古今事能知賢聖心態懃更努力要必免
牛襟

園丁

園丁秋後報菜甲雨餘嘉早薤肥青葉新薑長白
芽先燒與可筍更爵邵平瓜晚食能當肉甚於落
齒牙

晨起池亭有作

昨夜南塘雨澄澄綠可餐蒲芽抽似劍荷葉大如

盤魚亦焉知我蛙曾不屬官臨池空有興逸少香
難攀

謀生

謀生知短拙卜地愛清幽水澗寒塘靜陰深老樹
稠小風蒲獵獵細雨筍抽抽閑適餘何事吟哦得
自由

寓題六言

樹頭花開花謝簷前燕去燕來生涯三萬書籤心
事一兩酒杯

入室携幼盈尊倚窓出雲倦鳥前身三逕處士今
時四佳詩老

錢兄自少絕交竹友到老深契只欲偷閑一生不

要流名百世

曉起聞壓酒戲吟

老病相仍渴肺腸喜聞新酒壓糟床憶曾托契同
歡伯畢竟封侯老醉鄉中聖何妨祖徐邈盜隣知
復慙畢郎詩鈞愁帚非虛語半醉吟哦狂復狂

殘年

殘年無術救沉綿藥有君臣酒聖賢異跡敢追黃
橘叟高蹤欲擬紫芝仙是非自可時三必得喪何
須要十全頗識知音天下少如今已斷伯牙絃

寫懷

當頭萬事輒生疎得失榮枯亦自如廷尉宅前今
有雀孟嘗門下舊無魚閑教稚子時丸藥為喚園

丁日課蔬多病掩扉空白髮故人應著絕交書

幽居

幽居閔寂絕塵譁聊復逍遙送歲華靜愛飛禽穿
竹閑看睡鴨倚荷花撐腸不足廣文飯潤吻有
餘盧老茶晚節生涯宜自適更於何處覓丹砂

謾題

一陣南薰送晚涼高鉤踈箔倚烏床閑揮短柄青
蒲扇小炷微薰白木香世事十年三折臂愁懷多
日九回腸故山猿鶴應無恙悵望何時問草堂

用前韻

北牖清風納小涼紛紛書帙亂堆床高低樹木參
差影多少芙蓉斷續香天下何曾生馬角人間無

處不羊腸功名遂真難事誰似風流綠野堂

小簷

小小簷楹剪剪茅滿庭花竹影相交可憐狡兔謀
三窟自愛癡鳩守一巢子厚何心文乞巧揚雄有
意書辭朝我今短拙成何事長愧虛名未即拋

用前韻

真人何處訪三茅自是幽居絕俗交信步每携山
竹杖傳盃長對海棠巢欲從陶令東臯嘯休怪周
郎北岳朝金鎖綠沉少年事如今無興已全拋

小窓

小窓跌坐似僧房閑閣塵編日幾行高樹影籠書
帙靜落花飛入硯池香欲尋綺皓同棋局須喚劉

陶共酒觴世事外沉休料理人間歧路已亡羊

閑題

閑倚輕闌戀物華小風吹過顛烏紗池魚故故搖
新藕簷燕飛飛感落花棋博歡娛邀酒伴江山收
拾付詩家紅塵愁殺慵騎馬斗覺霜毛一半加

悼妻

琴瑟相諧五十霜那知死別亦蒼黃無由遺肉如
方朔不復齊眉見孟光昨夜已成坎曰夢今朝謾
作鼓盆傷樂天山谷能先我作賦題詩為悼亡

光陰

光陰荏苒白吾頭三伏紛紛雨未休紅藕花殘已
徂暑碧梧葉落先報秋山來不語能排闥花謝無

言亦墮樓感物感時仍感興有錢沽酒復何求

偶吟

身似浮萍鬢似蓬光陰虛度小窓中已同中散堪
成懶欲學昌黎賦送窮籬落霏霏梅子雨池塘淡
淡藕花風無心身外無窮事消遣惟須仗酒功

日本國負外郎陳祖田杏林亭詩卷

日邊紅杏倚雲端樹樹濃陰拂玉闌花正開時圍
錦幄子初成後綴金丸人居橘叟神仙上家在桃
源伯仲間肘後良方多妙用不須勤覓九還丹

送日本僧等堅

日邦人說出高禪今見堅師道骨全飛錫鰲岑驚
鶴夢浮盃鯨浪起鷓眠才高專對詩三百思透圓

機偈八千隻眼乾坤今歷遍袖中已草遠遊篇

謝豐山君沈公寄竹二盆

我家無竹俗難醫感子慙慙寄數枝結實豈無栖
鳳日取竿終有釣鰲時輕梢瘦幹凌雲志勁節貞
心傲雪姿蔣詡已非子猷逝平生癖愛舍吾誰

一身

一身多病更踈慵閑坐多時睡味濃琴本無絃同
靖節巾曾折角是林宗新梢纖弱初移竹老幹昂
藏舊種松已約故人同結社要憑詩酒話從容

夏日

六月炎蒸火日燒門無車馬更寥寥雨多已損攔
邊葉風怒能翻屋上茅詩句每於閑裡得愁懷更

向酒中消可憐稚子渾無事為新荒庭種菊苗

苦雨

却恐連旬苦雨來頑雲萬里撥難開漫天水勢高於岳捲地濤聲吼似雷無乃龍公多戲侮欲煩風伯掃淫靈乾坤光霽無日坐對水輪健倒盃

我家

我家籬落類村家地僻林深絕世譁風定莎庭鳥留篆日斜花塢蜂退衙功名過眼輕於鳥詩酒藏身縮似蝸書靜人稀酣打睡夢中解渴手煎茶

老向

老向青銅鏡裡催功名自與懶相猜病餘頗覺悶為藥醉後方知睡是媒日遣稚兒沽酒到時邀可

客看花來一生消遣無良策懷抱何人共好開

古人

古人賢達渺難齊萬事悠悠老轉迷北海高情酒常滿東山雅興妓相携少年志氣吾猶壯晚節才名世所低閑倚曲闌吟盡日刺桐枝上小鶯啼

淨潔

淨潔瘦骨髮如霜兔走烏飛有底忙妄擬文章追屈宋何曾富貴慕金張誰知依舊邁無懶自西如今老更狂終古知音天下少滿窓紅日撫琴張

少日

少日襟懷頗自奇中年落托漸垂籬田園何不悠然逝身世還慙久矣衰萬事當頭皆膽落一生自

足只心知閑居無事還多事吟苦多時捩斷髭

述懷

風滿疎櫺雨滿簾新愁幽興自相無孔丞已分二
宜去嵇老其於七不堪靜裡看書花鬢眼愁來攬
鏡雪盈簪六朝聖澤思難報碌碌虛名只自慙

閑題

數載封君霑厚祿官閑無事少奔忙竹君蓮友尋
常到菘子芥孫次第嘗豆麵尖新聊可口棗茶香
潤更搜腸一生眠食餘何管小醉題詩老更狂

謾成

塵世難逢笑口開無人可與共談詼愁應千種復
千種酒可一杯還一杯山果纍纍成子落池荷并

再送香來直揮俗客休干我長晝高眠鼻送雷

三用前韻

蕭條斗室復荒涼孤枕短屏又矮床小酌葡萄時
解渴閑燒楮拙細生香病衰轉覺凋雙鬢憂患難
堪攬寸腸安得百年長健在韶先肯我去堂堂

述懷

容顏消瘦鬢如蓬往事浮沉何賭中客笑陳登床
上下自憐陸老屋西東求閑守靜惟須懶守道安
貧莫送窮多病十年盤脚坐始知天地一樊籠

到諸富農舍

廣陵別業廣津邊卜筭今將二十年得米不須一
千斛取禾聊擬三百廛蓬門草閣疎籬隔竹塢棗

林細逕穿已作此間終老計高吟靖節去來篇
乾坤納納一江湖茅屋真堪著老夫李愿已求盤
谷序王維自畫輞川圖知機不早嗟何及投老将
歸計亦安得健帆高百丈東吳一去討尊鱸

登村墅後嶺

為上高岑聘遠眸廣津澄碧去悠悠淡烟芳草黃
牛嶺小雨平沙白鷺洲待月蘇仙仍縱筆登臯陶
令或臨流回頭北望長安近落日蒼茫任去留

道中望村墅

殘年雙鬢雪鬢鬢問舍歸田愧未能錦里風流杜
工部輞川行樂王右丞多時奔走慵騎馬何日寬
閑快臂鷹更為北山猿鶴語移文且莫誇騰騰

到夢村別墅

山下茅廬八九椽二年重到思依然四山轟轟青
環屋一水澄澄綠護田紅槿籬邊鷄亂叫黃茅隴
上牛飽眠此身可笑還堪惜未乞殘骸已白顛

夜雨

茅屋紛紛雨似繩夜深無語坐挑燈蛙爭聒耳綠
誰怒蚊聚侵膚最可憎天水蒼茫愁不盡鄉關阻
隔去無憑今年飽閱秋霖苦作歎頻思杜少陵

老矣

老矣吾今七不堪青銅白髮滿朝簪醉思五柳陶
潛宅吟憶百花杜甫潭高躅未成東郭隱閑眠只
睹北窓酣多生結習詩書在不必清虛麈尾談

種蔬

小園如掌棘籬低為種佳蔬一兩畦綠薤青菘香
更妙紫蘇紅蓼味應齊茄瓜佐酒仍共飯芹芋宜
羹亦可羹肉食廟堂如昨日閑居數載夢還迷

近因炎靈 命停 經筵臣以病休暇未獲
侍講者已踰三四朔有感而作

六朝長拱紫宸闈咫尺清光顏不違衰病淹留休
暇數從容陪侍講筵稀鵝黃屢賜宮壺醞孤白曾
頌寶藏衣更憶少年催詔日玉堂金燭夜深歸

小窓

小窓清坐膝容安滿架牙籤懶不看才調早追黃
太史風流晚擬白香山軟風池館開紅藕細雨階

除長紫蘭身世依違慙白首急流勇退古應難

遣懷

強半光陰病裡消定巾扶坐髮蕭蕭邊韶嗜卧朝
便腹陶令思歸懶折腰那得向人誇矍鑠便當遺
世飽逍遙日長無事圖書靜時復拈香手自燒

自叙

今古功名兩字難謬將文墨竊崇班人譏垂老猶
耽祿自愧疎才久曠官天地無情雙白鬢田園有
約一青山自從廣受辭歸後出處何人似謝安

再用前韻

經濟文章兩得難虛名曾愧動朝班敢將短技爭
長技不用冷官怕熱官曠達開尊思北海風流携

四信言集卷一
三九
妓憶東山一生正坐耽詩癖捫斷踈髯字未安

三用前韻

年來衰謝起居難
懶逐衣冠點鷺班
投轄陳遵長愛客
能詩元結漫為官
何須隱几追南郭
深愧移文在北山
樗散不堪昭代用
會當僵卧學袁安

四用前韻

蕭曹勲業策應難
豈有文章擬馬班
戀主長思終報國
逢人敢道欲休官
清新南國庾開府
奇恠西崑李義山
我亦郊寒無鳥瘦
騎驢長愧走長安

香鼎

香鼎氤氳裝細烟
清晨正坐續韋編
人譏學士今陶穀
自笑冷官古鄭虔
空有青氈書萬軸
曾無紫

索牘三千深慙覆餗招群謗碌碌含糊又一年

自詠

曾同叔夜一生慵
無物能來芥我肩
轉覺老懷增鶻突
早知病骨自龍鍾
多時官興益蠶淡
長日歸心豆粥濃
書几琴床聊自適
高吟豪笑坐高菴

七夕

銀漢迢迢拂暑流
佳辰七夕又新秋
鵲橋天上雙星喜
桐井人間一葉愁
捫腹無書棍可晒
寓心若拙巧何求
穿針陳果女兒事
何處繁華百子樓

書藁後

安有文章作一家
吟哦聊復送年華
已成飯顆山頭瘦
未得麻姑癢處把
少日有聲辭吐鳳
殘年無

夢筆生花他時傳藁誠難料處處留題有碧紗

古意三首

架上書萬軸林頭酒一甕風流友陶劉文章奴屈
宋崖巾髮蕭爽袒衣腹空洞萬事休苦心百年如
一夢人生天地間倏忽如過隙吾年近七十鬢髮
盡衰白疾病苦沉綿衛生無大藥胡為勞形役嗇
矣守幽獨人生有智拙智拙何所先拙為人所愚
智乃人所賢用智機已深用拙道可全智者不可
及拙以終天年

蓮塘曲

萬柄芙蓉蘸碧水花開爛漫雲錦綺夜來風撼青
玉盤聲聲驚聒鴛鴦睡朝來露珠圓又圓欲粧雲

鬢黃金鈿如何傾瀉珠復碎芳心已缺還復憐中
有藕絲千尺長織成可裁公子裳藕絲中斷不成
章誰家美人空斷腸

烏夜啼效古人體

烏夜啼風淒淒月欲低孤燈惺惺冷無影堆枕不
眠人語靜梧桐葉落氣蕭蕭芭蕉雨滴送悲響輕
寒細透白苧衫短髮如雪紛毵毵烏夜啼淚如綫
天長地久相思怨

短歌行

冬日一何短夏日一何長長短苦不齊脉脉空斷
腸新月出東峯落日沉西崗晝夜相代明輪轉何
太忙人生百年知幾何歡娛甚小憂日多君不見

馳車峻坂不停輟揚帆大海無停波又不見昨日
大醉今日醒纔見開花又落花勸君毋惜買酒錢
酒盡更須沽十千勸君百年長自愛少年安得長
少年古人賢達幾人在造物戲劇不相貸陶劉墳
上草離離空使後人悲感慨

演雅

鯤鵬能海運鳳凰自岡鳴已識屠牛法曾傳相馬
經蚕絲工利物蛛網誤傷生蟻穴有行伍蜂房分
戶局可憐蛙黽怒堪笑蠻觸爭喜見穿雲鷓堪誇
出谷鸞鷹揚牧野戰龍起草廬耕共向螭階下恭
陳燕賀誠

送日本僧元鷲還國

朝鱗鎮華岳日域近扶桑木道時來往鯨濤浩渺
茫上人隨使節昭代快觀光道骨如山瘦詞源共
海長真詮應自惜外想已全忘獨契三乘妙寧勞
四大忙幾年坐面壁今日遠遊方飛錫經仙島浮
孟渡大洋無生真面目了性本心腸軟語初歡洽
鈍根已斂藏法音元自在道韻亦鏗鏘臨濟傳遺
響廬陵續舊芳十方金作界三昧劍生鏗已認我
人慧自薰解脫香去留無滯跡遊戲亦逢場遠被
懷綏為親承寵渥滂東平聊館寓南首幾筵張鳳
闕宣招數龍墀禮遇彰 聖恩深不次 霽澤出
非常奉使真能事懷歸亦未遑方興徂暑日何處
望雲鄉畏景當離席長風送去檣馱經應滿艇乞

句已盈囊蘭欲香新渚松應偃舊房晨征龍八鉢
夜宿鶴同床入夢鷄林碧回頭鵠嶺蒼悠悠飛歲
月去去慎行裝正值同文日何勞遠別傷兩邦交
玉帛萬里接梯航應說吾王化昇平邁漢唐

四佳詩集補遺一終

四佳詩集補遺二

詩類 皇華集

次正使安州遇雪韻

飛飛春雪遍諸州銀海花翻凍玉樓肩聳似山吟
孟浩衾寒如鐵卧黔婁蝗應入地已多日夢想搖
波乃亦秋不用剡溪尋隱士使星佳會薩江頭
獲承佳什圭復不已敬依來韻聊復效顰乞
賜覽斤正見教

次過博川韻

崎嶇叱馭幾長途路入三韓興轉孤鴨水微茫連
瀚渤鰲岑隱映近蓬壺曾無意茲隨行橐只許茵
陳入客厨奉使賢居殷侑上詩才亦不愧王蘇

次過清川韻

雪消新水幾篙深穩泛樓船快一臨酒送春光浮
盞面鱸隨雪色落盤心隨身自有蘇卿節懸橐曾
無陸老金且莫詩成一高讀老龍泓處已愁吟

次登百祥樓韻

名樓勝槩四時宜晴後還能雨亦奇赤壁可無蘓
老賦秦淮曾有杜生詩百年往事山猶在萬古長
江水自遲芳草晴川留傑句憶君時復賦相思

次百祥樓却妓韻

鐵腸元不撓娉婷不是都迷禮重輕粧點姬娥猶
舊習懽娛賓主是真情觀風採俗誠能事納汗匿
瑕亦大名莫說風流陶學士信君心跡本雙清

次晚登甫寧館韻

春寒料峭乍晴陰春興春愁兩不禁王粲他鄉懷
土賦杜陵一飯戀君心欲彈流水高山曲誰和陽
春白雪吟看盡東韓奇絕處六鰲頭戴四仙岑

伏承盛作獎誘踰分不勝惶愧謹步韻錄似

冀賜一粲

高才應不數劉叉伯仲蘓黃儘可誇妙句已追吟
柳絮鐵腸曾解賦梅花臨風玉樹多新態出壑銀
冰絕點瑕喜識中朝有麟鳳要將題詠碧籠紗

次晚宴安定館中韻

宴時勸酒有天寒
消酌不須辭之語

天寒滿酌不須辭賓主相勸此一時斯道百年存
古脉神交千里樂新知樽開北海將三夜壽獻南

山又一巵兩使驚看雙白壁衣冠復覩漢威儀

次憇江亭韻

以下使韻

承綸兩星使弭節住江亭遠水鷓邊白遙岑鳥外
青倚船時復興 棹晚堪聽野酌莫辭醉天寒吹
易醒

次清川江韻

東韓襟抱好山川博水溶溶薩水連往事孤隋堪
一笑聖朝耕鑿萬家烟

次百祥樓韻

樓下長江鏡面澄興來長嘯一閒登珠簾捲盡山
如畫人在蓬萊第幾層

高樓勝宴好懷開星使文章倚馬才至味由來存

淡泊今時人物古罇壘

次却妓詩韻

前輩風流豈一端或堪長笑亦堪觀郵眠一夜魂
應斷越笑三年膽已寒頗信紅顏金縷惜從教錦
瑟玉纖彈牧之落魄名猶在何況 佳鐵作肝

次甫寧途中韻

雪消原野水縱橫滑滑泥途怯馬行孤館殘燈春
夜永使華風味十分清

復用前韻錄似正使大人文侍下

次過博

春泥仄滑響脩途野渡歸來一艇孤溪鯽有時來
入鱸山禽多事勸提壺可將風月供詩料誰挽江
山補畫厨試上百祥樓上看人間塵土已 蘓

次過清川江韻

春光無際深復深小坐危欄可怕臨當日濟川知
有手此時觀海若為心聲名籍甚連城壁詩律鏗
鏘擲地金萍水相逢是何處澧蘭沆芷憶君吟

次百祥樓韻

地靈人傑兩相宜星使遙臨又一奇芳草晴川崔
灝句白雲黃鶴謫仙詩梅花吐白春猶早蓮燭搖
紅夜政遲聚散由來元有數東雲北樹幾相思

次却妓韻博笑

古來賢達惜娉婷公子歸來燕燕輕雲雨巫山空
復夢鴛鴦野渚謾多情風流白也誰能躅落魄枚
之亦有名使節高懷誰得似廣平腸鐵抵梅清

即席

使華辭價重連城臨水登山一舸橫北闕絲綸初
奉詔東韓草木亦知名傳杯且可逡巡飲緩棹從
教取次行浮碧樓前拚一醉生陽歸路馬蹄輕

次韻

使節駢馳椒曉裝蘭舟暫住浪江陽寒梅嫩柳春
方好憑管繁絃晝正長弭節東韓千里地回頭北
闕五雲鄉燕山漸遠漢陽近宦興羈愁正渺茫

次登浮碧樓韻

高樓直壓大同清望盡東郊掌樣平有興危欄客
未散無人古渡潮自生遠遊司馬四方志奉使張
騫萬里情身在江湖心北闕幾番回首望神京

次謁箕子廟韻

白魚當日瑞周王殷土茫茫社已亡
洪範彝倫明日月朝鮮茅土有金湯
八條羨俗檀君後九尺遺墳沮水陽
丹荔黃蕉千載祀空令過客爲悲傷

次浮碧樓韻

樓壓澄江倚晚風入間咫尺隔塵紅
青來未了山從北白去無心水自東
望斷孤舟橫古渡眼穿獨鳥入長空
鵠峯漸近鳴江遠回首蓬萊是帝宮

次登舟韻

晚棹樓船故移朝天石畔沮江西
永明浮碧登臨地古木回巖李白題

次韻平壤懷古

大明文化東漸海天子龍飛十二載梯航萬國文
軌同百二山河形勢在百年文物涵升平文章粲
燦奎璧橫夔龍接武賢廟謨衛霍萬里爲長城東
藩世世守荒裔屢荷皇恩報無地民部先生持詔
來燕山鴨水四千里紫微垣中瑞紛攘震索毓慶
封儲皇堯明舜格協重光禹照暉暉燭四方謳歌
萬國賀接踵早建東宮過大宋我王事大出忠誠
遣使奉表脩獻貢先生才藝况老成筆繼先秦文
西京早知中國有人物祥麟威鳳何昭靈朝鮮開
國久合併金城湯池關岳嶺天山掛弓海無波刀
斗不鳴寧四境隋唐贖武笑區區聖代包荒今古
無錫貢相望同一家千秋萬歲佐皇極我生見聞

苦穿鑿恨不中原事遊學井蛙安足語大海望洋
今復羞海若天遣先生爲一來目擊道存心孔開
我有扶桑之繭大於甕助君文章五色裁

次自沮江至生陽館有依韻

古驛長林喬木春郊暖日嬌雲客路長亭短亭此
時逢君送若

江流新開玉鑑山勢或分金文何山多少仙臺此
地兩三村家
茆屋人烟孤起板橋春雪平鋪客中殊驚時序馬
上閱盡長途

黃州不可無竹滕閣難再盛筵星使文章獨步天
朝雨露深偏

次雪後黃州韻

霏霏曉雪玉成堆十里溪山罨畫開虛白遙連仙
境界軟紅幾隔世塵埃人從天上星堪摘雲向樓
中鶴共來今古登臨幾人在使華題詠揔雄才

次和陳黃門韻

雪餘乘興復登樓霽景撩詩豁兩眸司馬奇遊增
跌宕謫仙絕唱更風流江山萬里歸圖畫民物千
家樂穡疇若對使星詩又酒人生不要鶴錢州

次和金太僕韻

文星昨夜照黃州妙手曾修五鳳樓鯨海茫茫天
不盡鰲岑隱隱地還浮吟詩彩筆初飛動對雪珠
簾已半鉤聖代才名誰獨步文章今不數枚鄒

次道憇亭中小酌韻二首

一區山水老雲烟春雪新消綠護田行盡鳳山西
海路碧天浮水水浮天
野酌無巡滿學春江魚種種白於銀山村人物猶
情思指點星輶看鳳麟

次登鳳山環翠樓韻

民曹手捧紫泥封徠播皇恩雨露濃五色文章曾
吐鳳千金妙技已屠龍謫仙詩句三千首杜甫烟
花一萬重王事有程宜鞅掌馬蹄又踏鳳鳴峯

昨日蒙賜鳳山賦昔左思作賦門墻藩溷皆
置紙筆十稔乃成今先生倚馬而百韻俱成
視左思軼而過之顧僕何人強效西施之顰

我然盛意不可負復次鳳山環翠樓詩韻用

物體錄奉賜覽一粲

箕子祠碑荒藓封大東城上春雲濃黃州竹實見
棲鳳環翠松潮吟老龍滄海西頭幾千里慈悲址
上三萬重龍泉劍水是何處落日半竿愁亂峯

次登鳳山環翠樓次陳內翰詩韻

玲瓏環翠接雕甍人在瓊樓最上層劍水蒼松間
送籟鳳山白石自生稜馬蹄踏散銀盃雪樓角齊
垂玉筋冰準擬芳菲三月半更携樽酒與君登

次絕句

奉使他鄉豈定居黑頭身世赤心孤箕裘事業吾
能說袖有君家圮下圖

次至龍泉館韻

自別燕山月幾環龍泉孤館仲春間
輕陰濃淡連平野積雪差峩遍
四山輅許樓臺供小坐未將樽
酒博長間皇州四月花如海使罷行行得意還

復次前韻錄奉求教

暉暉初日亂紅堆長嘯登臨一笑開
黃鶴白雲空歲月彫欄盡棟出氛埃
雪如金谷墮樓去山似樊侯排闥來
兩使題詩真伯仲半山猶讓郭生才

又次

暮天霞鷺共飛薨踏上一層又一層
小水中分流細細遙岑高出瘦稜稜
須知六月膚應粟不待三冬骨欲冰
如此江山可無句才名似我愧陳登

又次

瀟條孤館似僧居老壁寒燈不可孤
我報東韓竒覽處袖中擎出海山圖

又次

溪流如帶復如環信馬行行積翠間
悵望白雲猶隔嶺回頭紅日已弭山
征鴻薄暮分飛去啼鳥深春自在閑
惆悵年來慣離別不堪他日送君還

辱贈佳篇步韻以謝

揮毫霹靂賦新題長笑三都久締思
莫說八叉鳥大速曾知七步亦云遲
襴衡鸚鵡人休詫阮籍鷓鷯我自
知他日明光堪入獻宜教彩筆寫烏絲

次龍泉館韻

古館歸來暮危樓眺望餘春聲鳴泛水晚景驚齊
霞江碧偷僧眼山青學婦鬢殘燈過一夜惆悵感
年華

次寶山館韻

九十日春已強半餘寒惻惻掩山館博山一炷香
氤氳牙籤玉帙可供玩遺我古劍霜纏紆蛟龍犀
象堪剝屠君不見古道今人棄如土琴到無絃知
者無

次韻

金巖途中遇雪
效禁體

江雲黯黯雪亂飛東風捲地來隨之無乃龍公試
妙手 弄造化無休時乾坤包括多奇才瑾瑜匿
瑕無纖疵所以三白曰為瑞萬物霑沐涵蕃滋我

今遇雪陪星使乘興安敢辭驅馳有履不學東郭
行有髦不學王恭披紙帽尖新似高屋馬蹄仄滑
官道歧玉樓已粟銀海花吟安一字撚斷髭先生
雅懷嗜淡泊棠蘭九畹露三危兔園當年才第一
白戰又駕歐陽詩不羨竟家黃金鍾珠璣萬斛東
海陸歸來孤館清夜深梅花窓畔月初規

次正使韻

開城十首小

一朶松巒高入天荒城落日鎖寒烟傷心莫問前
朝事雲物渾非全盛年
壤垣牢落樹層峨故國歸來慷慨多過眼興亡如
一鳥百年不改老山河
五百年前文物新英雄有骨盡黃塵君看崧岳由

來峻今古生申不乏人

金遼往事笑區區岳嶺關前草欲蕪宋史著稱三

大國傍人莫比古九都

薩水前頭海霧昏青山默默怒濤喧憑君莫說孤

隋事故壘無人潮自痕

渺渺君山海島青禮成港口一舟橫誰謂宋遠江

南近猶是揚帆六日程自君山島達

三山海上翠峯巖天上星分使者輶紫洞仙人邀

一笑也宜控鶴捻鸞簫開城有

家世青氈第一清聖朝人物獨才名滔滔聒耳皆

蛙沸一曲峨眉洋無盡情雅來詩多論

詩道忻逢蔗境佳清篇一一爽秋崖都官瘦苦無

人識千古知音盡舫齋

和氣温温有脚春不才何幸挹芳塵人言四海皆

兄弟莫說今人非古人

次過臨津舟中韻

蘭舟穩泛坐中間一水澄澄碧玉環謾說海邊鷗

可狎貪看林下鳥知還天連滄海疑無地船泊孤

洲忽有山安得春江變春酒與君終日賭長閑

次韻過臨津

黃犢坡南白鳥波春江無際凍雲多詩成却怕蛟

龍聽袖手低吟緩棹過

小坐樓船瞰碧流一漚分作百千漚東風漠漠轉

羊角新水粼粼生鴨頭

再和過臨津韻

正使韻

兩使風流伯仲間清詩妙絕玉連環
滄江衮衮無窮盡白鳥飛飛自往還
雅興叨陪開北海高懷曾信壓東山
春光滿眼濃於粥人在中流自在閑

再和副使韻

二首

一帶臨津漲綠波由來雲物惱人多
自從星使題詩後聲價都能百倍過
畫舫牙檣漾碧流青樽瀲灩沸金漚
名區勝地神仙會妙手須煩顧席頭

三和前韻

兩岸層崖紫翠間長江西去碧灣環
從教綺席遲遲飲好遣蘭橈故故還
已有杯尊酬歲月可無詩

句蒼溪山蘓仙赤壁堪追想牛斗徘徊氣象閑

三和副使詩韻

春光綠染葡萄波菩蕾粘枝生意多
一陣東風醇似酒江城昨夜春雨過
瞥眼光陰江水流人生聚散如浮漚
明朝鴨水一相別渺渺燕山天盡頭

次正使曉發碧蹄館詩韻

碧蹄驛裏已殘更騎馬平明到漢京
一札十行頒帝詔三呼萬歲動宮城
中原人物鳳麟瑞奉使才名水蘩
群父老滿街扶杖聽導宣霈澤說君行

次副使發碧蹄韻

鷄鳴何處店曉色未分橋自是勤王事
何曾嘆獨

勞

奉閱行藁自燕山至鴨江四千餘里凡於物
像隨所感觸莫不諷詠長韻短律春容典雅
餘數十篇誠富矣哉今承雅教輒依韻奉賡
不亦有雷門布鼓之譏乎冀垂仁採納

次韻奉使出京

地官聲譽屬青年曾奪宮袍五色鮮
筆陣自能傾十萬詩篇復道近三千
乘軺持節皇華使步玉登金粉署
賢手捧芝綸辭鳳闕先聲已動海東邊

次韻過榆關

早建皇儲為正名謳歌四海仰昇平
使星躔域頒新詔卿月榆關照故營
鴨綠行看龍節過猩紅曾

賜數袍輕詢咨亦不遺邊策會見挽潢洗甲兵

次韻登山海鎮東樓

樓與浮雲一樣齊憑欄徙倚思淒迷
山窮形勢長城盡天觀滄溟落日低
聖代即今清漠北將軍應不數征西
江山猶記曾遊處板上紗籠認舊題

次韻發廣寧都憲諸公餞于東郊

文章老詞伯萬丈光燄風雲入壯懷
錦繡供揮灑奉詔出神京行裝自清儉
巫閭碧層層凌河晴艷艷春色引行騶
旅况殊不厭故舊餞城東相將鋪几簞
一一具壺觴話語頭相點朔漠望無涯
長垣倚天險道途阻且脩雲雨開還掩
意氣增跌宕落落少拘檢談笑吐虹霓
長歌撫腰劍陽春調更

高酬唱真竊忝我手袖已久區區愧鉉槩

次韻高平道中

高平行又到閱盡古并州
薊樹在人背遼雲生馬
頭晴暉連碣石夜氣接
盧溝奉使能專對終非
博望侯

次韻三义河

三义是何處萬里欲歸人
泛水鷗群早連空野色
新馬鳴長塞外船泊古
河濱須識皇恩大多方
息戰塵

次韻尖山觀獵作雉之飛

雉之飛雄與雌五彩燦爛
輝朱衣角角粥粥鳴相
依刷羽弄影相追隨不
怕獵火紅四圍雉之窮
誰

汝跡原頭獵騎來相逼銀
鏃橫斜道不得猛士如
雲競誇績幕府傳觴多
喜色歸來笳鼓擁三軍
塞天萬里飛晴雲

次韻廣寧道中宿土民家

正月寒園未解兵廣寧歸
路尚稜稜只堪索酒尋
村店不用顛茶訪野僧
問岳千層橫劒戟長墻
一面繞丘塍晚來投宿
茅廬靜獨坐吟殘半夜
燈

次韻將至鴨綠寄遼陽潘侍郎陳憲副

亂峯晴皴暮雲平鶴野龍
灣復幾程別後寄書皆
故舊明時盡節為功名
關河風雪雙旌落天地
冰霜一橐清原隰縱然
懷靡及間情亦不負詩
盟

次韻過鴨綠江

鞍馬風霜度 遼鴨江東下路迢迢回看鵲岳明
如畫細聽龍川夜送潮五色絲綸頒下國萬年日
月麗層霄邊人報道皇華至車騎喧填迓遠橋

次韻宴義順館

駢駢四牡路透遲飽閱江山又一奇酒送鵝黃浮
盞學江分鴨綠上屏帷驚心月色涵鯨海回首春
光滿鳳池草草邊城拚小宴可能無愧享多儀

次韻良策驛

滿崗春雪冷侵房草草賓筵具酒觴遠接如今慚
禮薄曉天行色馬蹄忙

太平民物盡春臺四海八荒壽域開似說離明重
照日星分天上海邊來

次韻車輦館盤松

竒材胡屈大途傍聳壑昂霄自有方根露紫龍長
偃蹇枝翻翠鶴欲飛揚生來磊落凌風雨晚節孤
高飽雪霜擬見茯苓成琥珀傍人且莫視尋常

次韻林畔館

東林城郭古咸關道出崎嶇兩岸間白雨滿空迷
後嶺黑雲擁樹失前山誰寄梅花憑驛使忽看春
色遍人寰茅叢油帽江南路宦興羈愁不可刪

次韻雲興館

鵝鳩聲裡雨新晴公館無人晝不興綠蟻刺看浮
酒罍蒼蠅時聽叫茶瓶西南蜃海千尋碧東北鰲
山萬疊青多少邦人爭拭眼海東昨夜照文星

次韻嘉山嶺

嘉嶺躋攀勢轉高江雲白白細於袍香山遙認橫
鴉髻博水平看湧雪濤萬里客懷猶北闕一年春
事已東臯使華行處皇恩重車馬麟蕭擁節旄

次副使宿良策館韻

二月初旬來海國江山雖好異風光春寒尚凜貂
裘薄小雪霏微濕不妨

次副使曉發林畔館韻

海天渺渺馬如飛曉霧空濛半濕衣吐去一聲何
處鴈燕山回首寄書歸

次副使宿新安館韻

西海茫茫萬里餘登樓縱目凭欄初丈夫弧矢平

生志安用鄉閭下澤車

次副使過堂於嶺韻

薄酒春愁未解圍江雲黯黯雨霏霏躋攀欲上堂
於嶺石徑盤回出翠微

次韻正使朝鮮雜詠十首

隋家事遠征勞師渡遼水旌旗翳白日舳艫彌千
里威靈振東海城守俱風靡一朝兵不戒將軍陣
前死晉陽真人好大亦無幾剛強不足恃勝敗
無定軌年年江自波欲雪萬古恥

妙香山峩峩沮水發源派來經松壤都襟抱玄菟
界古來爭戰地毒螫劇羣蠱緬懷隋與唐紛紛幾
成敗往事既如此江流自澎湃窮黷古所戒虛內

而事外

檀君逝口以箕子遺風清民淳俗可封井地仍薄
征東明王帝孫富國能強兵孱孫失其道戰伐飽
所更堂堂李將軍克捷成大名王氏開西京雉堞
天中橫我朝作東藩金湯壯地形

瞻彼首陽山盤根幾千里茫茫西海水極目無涯
埃昔人一何奇來往倏彼此無因躡其踪有術不
我示望望去何之颯颯風生耳至今已千載欲尋
良不易獨立望大洋日暮風濤起

津流何太急太急不可臨公乎無渡河渡河烟沈
沈良人去騎鯨青鳥無來音紅顏隨以逝一一愁
人心我聞篋篋引浪浪霑我襟珍重霍里子聲名

橫古今謫仙不可作聊效西崑吟

有金四可知所寶非璧尺嗟哉巖與山揭號何物
色煌煌天上使矯矯百夫特惟善以為寶清風動
槐棘孔兄非所友蒼茲難眩惑投我以明月報之
愧沙礫貴義而賤貨二者在所擇願保千金軀千
載崇令德

丹丘有羽人雪膚仍玉面六鰲頭戴山蓬瀛時隱
見袖有黃金丹飛騰術已銜飄然駕笙鶴九州遊
已遍界上十二樓仙風吹又便玉盤千年桃拜獻
瑤池宴我欲往從之弱水今清淺

有箕生傳說有嵩乃降申豪傑應時出千載流香
塵先生光岳精聲名四海聞舉舉瀛洲仙堂堂廊

廟珎奉使來我邦風裁一何新君看九州外或亦有其人

海上有扶桑旭日出其東琅玕以爲幹珊瑚以爲叢金鷄栖其上仙蚕騁神功五色成文章喬雲光相同可以資黼黻萬國宣皇風我欲解一纜飲馬咸池中手摘如甕繭爲獻明光宮

白日照中天重陰捲海嶠行行過朝鮮往事亦難料有樓可徙倚有山可登眺豪氣蓋九州聲名溢荒徼壯此風雲懷渾成霹靂嘯慷慨多新詩一一陽春調我今挹下風斤鷄愧鵬鳥

次韻副使却女樂

大平館裡起遐瞻松竹前頭雪正嚴惟有多情陌

上柳春風枉學舞腰纖

牧之清節負生平贏得青樓薄倖名多君索共梅花笑鐵石肝腸冰雪情

曾聞前代樂升平亦有梨園弟子名自是東韓遵古禮敢將雲雨惱高情

次韻副使謁聖

先聖堂堂百世師鑽堅瞻忽起余思萬古時中明日月休論和惠與清夷

春秋三百任君師麟自呈祥慰我思二百四十年筆削尊王抑霸辨筆夷斯文千載仰先師詩禮傳家到子思道統至今來有自綱常寧復問華夷

次韻正使謁聖

廟宮深處禮先師神在洋洋綏我思人說朝鮮一

鄒魯文風終古不陵夷

尼丘山屹勢竒雄宣聖高明日月同遺教杏壇風

不墮斯文泗水脉相通鳳芳衰德周流後麟也呈

祥述作中萬古素王嚴廟貌東韓典禮極尊崇

希聖從來亦聖徒橋門衿佩缺作成藹藹多

周士穿鑿區區笑漢儒先輩何曾輕後輩前途端

可取長途文章一洗隋唐陋多喜新詩起老夫

寒食清明又遠鄉不堪風雨顛狂漢江行樂唯

須早花渡歸心亦太忙勝水佳山同北固地靈人

傑擬南昌從教扶醉歸來晚月色如銀滿野航

陪遊漢江樓承雅命先賦近體詩二首錄奉

求正退之詩曰投章類縞帶行答逾兼金僕

以拙作安敢妄擬縞帶但冀和教耳無任慚

汗之至

樓中佳麗錦筵開樓外青山翠似堆風月不隨黃

鶴去烟波長送白鷗來登臨酬唱三千首賓主風

流一百杯更待夜深吹玉笛月明牛斗共徘徊

漢江春漲綠葡萄雨後新添復綫篙一纜徐牽驚

白鳥三山高挿跨金鼇銀盤細膾飛紅縷玉笋香

醪皴綠濤星使文章驚滿座詩成如我更麤豪

滿江紅效顰

尺五城南形勝地，畜眼未有自太古。尾星分野巨
鼇孕秀，宅都定鼎，金湯堅分裂。元非麗濟，舊蘭漿
桂棹，風流行樂漢江口。

鷓首飛翬，面吼瑠璃，鍾琥珀。酒使佳會，安得天長
地久。江山是壺中物，外人物非王。前盧後明，日參
商南北，何處空搔首。

次韻副使遊漢江

西湖落日泛樓船，人在蒼茫鏡裡天。錦纜牙檣驚
鷺夢，鷓絃鐵撥起龍眠。山當鯨海青還盡，水到蚕
頭碧更濺。雨散雲離，明日事回頭。漢水夢相牽。

次韻正使

揚花渡口繫蘭船，須信人間別有天。不必神仙同

鶴駕，要將圖畫倩龍眠。日明鼇背黃金浪，風撼龍
頭碧玉濺。須把西湖比西子，江山其柰興相牽。

次韻正使

風流江海十年情，坐對湖光撥眼明。山似高懷長
偃蹇，水如健筆更縱橫。柁樓舉酒日初落，官渡哦
詩潮自生。更待月明扶醉去，杏花疎影不禁清。
登樓豪氣有餘情，泛艇西湖一鑑明。酒量已嫌江
海窄，劍光直上斗牛橫。邗奚好善傳家有，徐邈狂
言故態生。揮塵高談客未散，揚花渡口管絃清。

次韻正使龍頭山晚酌

解纜初登渡口峯，竒觀愈富思無窮。生來氣習詩
三上，今復豪狂酒一中。山勢周遭天宇迥，江聲斷

續海潮通座中盡是神仙客咫尺東華隔軟紅

又用前韻拗體

西湖之西蠶頭峯千古萬古江無窮長天欲盡去
鳥外落霞已齊孤鷺中騎危却怕斗牛近浮槎直
與河漢通春酒春江孰深淺夕照一抹芙蓉紅

次韻副使龍頭峯二絕

漢水春風碧玉灣楊花嶺上共登攀使華潘國風
流地大覺昇平氣象還

西湖瀲灩又春晴豪氣元龍意氣橫青嶂白鳩圖
畫裡一竿斜日半江明

次韻副使登大平館樓

皎皎白玉京遙遙滄海陬駕言使者輶來登賓館

樓俛仰一今古徙倚凝兩眸長嘯吐虹霓豪氣浩
不收信義非吾土旅况兼春愁燕山鬱岌岌鶴野
何悠悠薄言賦旋歸行行大刀頭下可慰慈親上
可答冕旒

臨津渡謾賦一篇錄奉求正

春光駘蕩天氣新春江綠漲生玉鱗長風吹吹泛
樓船兩使風彩如神仙豪吟已見蛟龍驚揮毫落
紙雲烟橫座間中聖老徐邈狂言屢發何磊落明
日况是暮春初蘭亭渺渺能起予蘇仙風流四百
年赤壁風月今依然詩如不成可浮白人生佳會
難再得嗚呼樂極悲奈何聚散自古如搏沙他日
相思渺南北江草江花豈終極

卽席伏承和韻巧速無化不揆鄙拙復步韻
錄奉博笑

臨津江水藍色新初日照耀黃金鱗春醅漱艷棹
觥船縱筆試學東坡仙先生高談四座驚先生意
氣霜鶻橫余生荒陬之渺邈有材無用空獲落憶
昔少年賦遂初至今白髮能愁予堯夫生死太平
年平生得失俱茫然文章何用追甫白亦可安排
隨所得詩成話別可柰何塞天漠漠飛黃沙我自
東還君已北落日看看下鼇極

次韻正使重渡臨津江

千古東藩是我邦金湯襟抱壯湖江天恩已感彤
弓一星使驚看白壁雙湯網恢恢洞三面堯門蕩

蕩開八窓地官高調誰能和詩壘 幢已豎降

三月三日途中且遇寒食述懷錄奉賜粲

江湖索寞斷人烟百五正當寒食天節物今年差
較晚風光觸處動相牽金巖日暖初楊柳劍水春
寒未杜鵑辜負踏青酬令節客中時序劇悠然

次韻正使見和

桃花癡少杏花憨旅館風情三月三杜甫麗人今
不見羲之楔會邈難然登樓作賦憑豪氣把筆題
詩倚半酣上巳當年屬何處龍泉西畔鳳山南
春深客路好風烟又值清明上巳天幾樹早花仍
雪溢千條弱柳受風牽似聞遼左有歸鶴何處涪
南無杜鵑腸斷關西二三月感時傷別思茫然

老病心懷已大慙，人情飽閱徂四三。自知驢技止如此，今愧龍門猶謬參。白雪陽春難報答，暖風晴日轉清酣。使華高節如君少，端合才名斗以南。

次三月三日途中絕句十首

清明又寒食，節序去分明。白髮非春事，臨流空復情。春山仍臘雪，三月猶未花。昨夜已雷蟄，抽抽初筍芽。江城杏花雨，盡日江草風。客路幾千里，雲山西復東。山禽亦何事，喚起又催歸。最愛重來燕，年年傍主飛。依依陌上柳，萬萬黃金條。折以持贈客，莫學女兒嬌。客路定何處，送客無送春。長江去不盡，日暮愁殺人。貂裘尚三月，惻惻春故寒。一別四千里，頻年吟澧蘭。忽忽已春晚，行行恰得詩。似曾相識我，燕子故差池。

傳家舊清白，落落非時流。君橐金寧晚，我囊錢已羞。相逢一萍水，歲月如郵亭。白髮悲青鏡，別離飽所經。

次韻副使重過金郊驛

九重紆睿想，萬里數歸程。蘓武曾持節，終軍舊請纓。風雲開際會，天地屬寧清。好展經綸手，蜚騰佐聖明。

次韻副使重過龍泉六言二首

衰柳輕漾嫩綠，牆桃半綻嬌紅。佳辰令節難再，旅况春愁何窮。依倚驛館江北，多少人家。崦西雲去，間拖驟雨日斜。忽放晴寬。

次韻副使寒食寓鳳山二首

誰家踏青處五五更三三山杏紅初艷汀莎綠正
飈風光連海北雲物勝江南時序今如此馳驅我
不堪

西笑君今向帝畿一年春事已辛夷清明寒食連
三日急雨顛風似昔時

次韻正使清明寓黃州有感

長程催馬為登樓小雨霏霏欲濕裘莫遣青春空
寂寞擬招黃鶴共遨遊晴川芳草新添興落日浮雲
愈起愁辜負良辰足不惜一生猶幸識荊州
妙手推君五鳳樓贈來珍重鸚鵡裘義之觴詠曾
脩禊司馬文章又遠遊沂水春衫可言志曲江破

帽狂生愁芳辰勝地題詩處豪氣須看隘九州

次韻副使次祁正使詩

百五風光更上樓故園何處是菟裘我因遊宦迷
佳節君憶長安說勝遊千里關山千里夢一番風
雨一番愁香車寶馬誰家會怡悵今年滯遠州
日暮行裝獨倚樓春衫未試尚重裘還家搃說江
南好作客其於海上遊紅雨落花生晚興綠烟芳
草長新愁三分春事二分過醉閱關河數十州

黃州近體詩十律承雅教奉酬

真主龍飛鳳曆新細縕一氣轉洪鈞星辰北拱環
天上聲教東漸及海濱治軼元和歌聖德才多炎
漢頌賢臣新聞鶴禁三朝慶益鞏瑤圖萬萬春

盛代車書混四方際天極地接微茫周官禮樂尊
中夏禹貢山河罄外荒北闕違顏同咫尺東藩荷
澤異尋常君臣齋沐聞天詔在筭推恩亦寵光
仙輶飛渡鴨江清為播綸音示寵靈愛日已能蒸
畏日使星知復帶文星晉朝人物推祁子唐室功
名數九岭專對歸來紆睿眷好將勲業佐宸庭
聖皇至治已登三猶復民天顧畏巖禮樂三千追
雅頌山河百二壯駭函鳴崗有鳳為周瑞吟澤無
人怨楚讒似說明良賡載盛煩君珍重寄遺絨
句麗鼎峙濟蕪羅往事茫茫瞥眼過隋將胡然經
薩水唐兵無復渡遼河金元偕竊并吞久幽蘇紛
紜戰伐多四海卽今清似鏡漢皇空賦大風謠

檀王元不與周通箕子封來履大東五畝田桑姬
制日八條治化禹疇風龍蛇分戰曾三國鷄鴨神
功又一雄自幸朝鮮逢聖代百年文物太平中
東風草木兩新霑驅馬從君遍海閭當代文章應
獨步一身忠孝自雙兼無錢可贖囊應澁有句如
神藁自添擬見使還前席罷潭潭相府具民瞻
黃甲才名擅一時民曹 荷鴻私詩曾雅古追
高適賦或鋪張倒左思任重周官時地利才高大
雅賦驅馳使華清切如君少姓字東韓草木知
堂堂豪氣吐虹霓磊落胸中萬卷書擬向明廷瑞
麟鳳肯從爾雅註虫魚楷書獨繼永和後詩道中
興大曆初不分當年陪杖屨霏霏玉屑笑談餘

朝鮮邈在海東頭使節言旋不可留國俗由來心
變魯藩邦終古義尊周涵濡帝澤天同大藉甚君
才史可求老我胸中多少策臨分含笑看吳鉤

次韻副使重渡大同江

要遣蘭舟取次過晚來詩興柰狂何大同江上春
光好浮碧樓前月色多心本虛舟那彼此語憑重
譯半澆訛醉中爲贈干將劍霜刃如新十載磨

次韻正使重過大同江

浪水吾今幾度過故都興廢淚雙沱天荒地破江
山變物換星移歲月多過客每瞻箕子廟行人遙
指發盧河隋唐渺渺俱陳迹不用登臨慷慨歌
天上星官海上過雨分恩澤更滂沱日移簾幕花

陰轉春擁樓臺柳色多滿眼芳菲驚節物傷心送
別隔關河醉中遮莫傍人笑更起樽前擊劍歌

大同江舟中謾賦一篇錄奉求正

天上之星人中龍風彩濯濯春風容浪江暖添桃
花浪錦纜牙檣搖畫舫城頭柳色黃如鵝白鳩似
雪雙飛過浮碧仙人來相迎芝輪羽蓋吹鸞笙銀
甕試開紫葡萄玉盤爲獻千年桃人間俗子如
烟喜一得見瀛洲仙瀛洲之仙亦一笑白日政長
青春好上帝高拱蓬萊宮待君瑤池歡宴同浮碧
仙人挽不留飄然駕鶴還帝州只有驪珠三萬斛
散落人間收不得天漠漠江茫茫送君霄漢空斷
腸朝天石上雪浪白麒麟窟前春草綠

四佳詩集卷之二
三五
次韻正使寄題箕子廟

邦國興亡繫一身玉杯其柰竟商淪可憐詰語敷

心處歷歷忠誠已露真

大厦元非弱木支三仁心事可堪悲東韓蕉荔千

秋祀寂寂墟草自離

直以忠言忤一夫操琴幽憤可何如九疇一為周

王授千聖相傳自有書

分茅東土後檀君禮樂詩書燦有文萬古朝鮮民

受賜一盃聊復酌孤墳

韻副使重過大同館

箕都形勝地時復一樽同水漲桃花浪船搖柳線

風使華名已重藩國禮尤崇酬唱曾非分還慚語

不工

次韻副使重過安興館

張旭傳神筆徐凝愧惡詩樓臺重會合雲物又清

奇樽酒生前夢江山別後思一聲何處笛人在晚

船吹

次韻正使萬景樓

畫棟瓊樓拂紫氛登臨勝槩愜前聞山橫野外鴉

鬢細水到灘前燕尾分身世却疑凌汗漫文章長

愧乏齋云夷猶直擬招黃鶴倚柱微吟日又曛

燕山回首是皇畿客路東風吹滿衣日暮湖光迷

潏灩雨餘山氣轉霏微天長獨鳥穿雲去浪靜孤

舟緩棹歸南去北來春亦暮轉頭時序疾如飛

次韻副使重登百祥樓

滿汀芳草綠芊綿，納納江湖萬里天。
瀲灩波光靜，沉璧空濛山氣冥。
生烟蒼崖斗絕巖，僧寺白鳥輕飛送。
釣船始信人間有仙境，紅塵身世復堪憐。
閒倚闌干坐大還，一樓高插斗牛間。
潮生水國是官渡，日落海門知遠山。
身在江湖思魏闕，夢隨鷺鷥響朝環。
人生會合無多地，樽酒風流可解顏。
萬里關山正渺綿，帝都西去路如天。
盧溝曉接遼東月，碣石晴連薊北烟。
雪盡更回高嶺馬，春深穩泛潞河船。
星輶欲挽思難得，脉脉相望只自憐。
使罷行行得意還，蓬萊矯首五雲間。
乾坤自繞雙龍闕，日月常低萬壽山上苑。
開花金燦爛，御溝流

水玉回環君歸前，席應敷奏咫尺重瞳識聖顏。

次韻兩使重過清川江

萬頃樓前古渡頭，一樽相對更夷猶。
孤帆破浪動高興，春草滿汀生晚愁。
老我幸叨徐孺榻，傍人錯比李膺舟。
江山如此人如玉，赤壁何曾擅勝遊。

博川江用前韻錄上求教

亭午來過博水頭，從教緩棹小夷猶。
供吟且可商量飲，惜別新添自在愁。
身世吾今伏櫪驥，功名誰是濟川舟。
玉堂天上長年事，夢裡何曾記舊遊。

次韻兩使重過博川

東風吹暖已消冰，官渡孤航又共登。
野馬飛時狂是絮，春山燒盡禿於僧。
不堪客裡愁如海，須借樽

前酒似澠日暮傷心是何處一聲清唱半江菱

復用博江詩韻以寓景慕之意離別之恨錄奉文侍下若一下覽足知區區下情矣

使華清節藥兼水深愧龍門忝一登詩句曾驚癯似鶴行裝自信淡於僧嘉山落日紅蒸藕車嶺垂楊碧染澠明向江頭持贈客晚訂何處採芳菱丰儀灑落出壺冰萬里通津已立登原道昌黎文表佛能詩鄭谷字多僧宮袍賜處紅翻錦御醞頒來綠漲澠一別雲泥迥相隔思君日日採江菱

昨承和韻相別日逼情不自勝又和元韻以抒下情

松竹高標傲雪冰聖朝良俊已崇登調和可作益

梅相迂闊終非粥飯僧鈍似駑駘寧望驥才高湖海莫言澠海東儒老中華使肝膽唯應照鑑菱正坐儒冠冷欲冰一生豪氣愧陳登空踈自信無腸子清苦真成有髮僧培塿何曾齊華岳隴瀧應亦讓齊澠葡萄首着非吾有為採江離間海菱鵲岳龍灣已泮冰送君時復費攀登相思脉脉傷春女獨坐寒寒結夏僧天上有人瞻北斗人間無酒變東澠驚心莫唱陽關曲不似當年聽採菱銷愁恨不似春冰有水可臨山可登留飲敢同投轄客輕裝大勝打包僧終期泰礪仍河帶不用看陵復酒澠日暮離亭多少思東風吹盡滿江菱文章李杜筆陽冰端合瀛洲十八登逸酒敢期蘇

晉佛留衣曾笑退之僧千軍詩陣能摧岳三峽詞
源可倒澠他日八珍天上宴倘能記我海東姜

次韻正使和詩

春溫如玉旋消冰與客東臯一嘯登蕩槩誰家採
蓮女携筇何處化糧僧山曾未了青如岱水自無
邊綠似繩日暮香風吹不斷江湖滿地無 姜
爲喚瓊漿小點冰晚淒扶醉快重登留侯有骨還
同婦房館前身定是僧官路崎嶇危似棧光陰荏
苒疾如澠平生幾度關西路又見春光已上菱
先生藻鑑炯如水不分詩壇共許登語妙君非烟
火客氣酸我似蔬筍僧蛙曾守井寧論海鯨已吞
江不用澠衆卉紛紛空滿眼崇蘭香芷異殘菱

殘年心事似雕冰壯歲釣天憶夢登獨坐真成卧
遊客遍叅不如行脚僧心隨江漢能朝海思入臨
淄欲訪澠何日從君東廣去吳江楚澤討尊羹
十年宦海履春冰無計飛揚要路登晚節香山思
鬻妾中年靈運酷耽僧虛名何用隴兼蜀真味不
殊淄與澠南望達城家萬里夢魂長繞故園菱

次韻副使重過林畔館

不分龍門揖盛芬天涯樽酒叙慇懃他時知我相
思處渺渺江東日暮雲

奉別兩使大人

傷心遠別白頭新鴨綠江頭酒數巡篋有珠璣詩
總好車無蓋苧素全貧帝恩宣室虛前席人自藩

邦望後塵珍重角弓嘉樹 流傳亦不愧前人
初旭暉暉映錦袍還朝知復列諸曹天開閭闔星
辰近雲擁蓬萊日月高帽壓宮花紅躑躅甕分宣
醞碧葡萄太平文物近周雅為奏皇華慰獨勞

次韻正使留別

白頭身世少知音在費機關十載心龜木千年緣
不淺我洋一曲趣心深春風無盡相思調落日空
成惜別吟自古贈言仁者事新詩珍重勝南金
青青官柳碧於苔三疊陽關酒一杯馬自籊雲天
上去鳳曾囑詔日邊來浮雲聚散傷心事流水光
陰瞥眼催一望燕山四千里相思莫上最高臺
承雅教題遼東鑿生孔志學惠愛堂詩卷

家傳誅泗術歧黃皮裡春秋肘後方藥有君臣劑
入妙火分文武鼎生香對君浮白金杯灑遺我還
丹玉粒光珍重更煩三昧手年來詩酒已膏肓

某遇孔君於鴨綠江偕至漢京又送江頭陪
遊浹四旬孔君又遺我妙劑

次韻副使重過鴨綠江

歲月悠悠水自流人間萬事似浮漚明朝鴨綠江
頭別一曲陽關白盡頭

次韻正使鴨綠江別韻四首

送君一杯酒不覺雙淚流分手空臨水傷心莫上
樓曳裾嗟已晚結鞵分纜投極目長汀晚遙遙望
去舟

隱隱鷓鴣山晚悠悠鴨水流頽濱方仗節王粲更登樓已見軻初發何能轄可投渡頭人散盡落日下孤舟
時序驚春晚離愁抵海深陪遊兩月事交道百年心潭淨玲瓏玉難喧破碎金遼陽是何處魂夢正相尋
交際皮毛少斯文骨肉深傳名思驥尾虛譽忝牛心價倍連城璧才漸躍冶金百年離別恨歲月老侵尋

次韻正使渡鴨綠江西還

西日淡芳渚輕烟翳林薄汀草綠更織巖花開又落長風從何來吹吹捲雲幕此時開別筵獻酬無

筭酌君詩三百篇一一皆佳作浩若江海翻蔚然龍虎躍而我才短拙自視寧不忤人生有聚散世事雜悲樂忽爾長別離令我懷抱惡行行策驂騶去去上臺閣傷心馬訾水奈此風濤君有濟時手行看試盤錯

定州禹判官回自遼陽傳盛作謹依韻和奉

鳳凰山正使

鳳凰山色蔚齋天鳳去山空事渺然雉堞有基樓孽虜鶴樓無地訪飛仙江山麗齊分爭日天地金遼割據年我亦開州曾吊古長林老樹鎖寒烟

次韻八渡河

復嶺重岡八曲河少年曾此再經過鱗鱗細浪涵

風皺咽咽寒聲得石多壯歲羈懷殊跌宕老來豪
氣半消磨如今髀肉生如許慷慨時時拔劍歌

次韻高嶺東望

高嶺宮峽插半霄憶曾騎馬度山椒一區風月詩
新就萬壑烟嵐盡不消日下長安看漸近天涯海
國望還遙荒涼野次渾無寐半夜松聲細送潮

次韻山行紀東寧土俗正使

昔過東寧路鄉風訪所由俗曾存儉朴人自業耕
疇黍粟田宜性桑蚕利倍收邀荒寬賦稅胥吏絕
誅求昏媾同閭落畝漁共壑丘茅茨連棟宇樹木
蔭田溝瓦甕晨菊酒沙缸夜潑油笑談喧柵內詔
鼓賽祠頭零落防身劍蒙茸御鵬裘居常隣醜虜

日復戍邊樓雨露皇恩大乾坤協氣浮烟塵靜四
海風化覃九州禮俗人皆變訛音爾可羞咨詠使
者事辰告是良猷

次韻光山下營

良將鎮邊屹似山營高細柳馬嘶閑龍堆鴈塞誰
分整鐵甕金城又壯關早識陣雲明眼底試看霜
刃吼腰間請纓我亦從軍去不斬樓蘭未擬還

次韻開州道中遇雪

東海茫茫天一涯開州西去站程賒二丘客路連
逢雪三月邊城不見花孽虜孤棲城郭在胡元強
噬歲時遯朝鮮萬古藩維壯聖代車書混一家

次韻九連城

聖皇千舞息紛爭
衛霍當朝萬里城
謾向策廷論表
餌賈生真箇是書生

次韻董家峪

東藩世世奉王春
有道曾聞守在隣
寵命荐加天子
聖詢咨大雅豈無人

四佳詩集補遺

詩類 拾遺

曉發

五更風露濕征衣
出向西門信馬歸
弘濟院前分曉氣
大慈庵畔淨朝暉
溪流九曲隨山轉
野路三叉入洞稀
行到齋堂成少憩
樹陰深處暑風微

滿月臺

禾黍離離滿故宮
崧山落落又秋風
渾將五百年前事
付與英雄一笑中

登箕城城樓二首

一上南樓睨望餘
風流往事想繁華
雲橫大野山連海
潮落平山水見沙
落日溶溶紅似藕
歸雲點

點黑如鴉晚涼狂興先扶醉笑倩佳人整帽紗
老夫情興絮粘泥重到箕城物色迷浮碧樓前始
相語齊安館裏苦分携鸞膠可續前絃斷鳳燭添
成別淚啼滿酌陽關一杯酒渭城清唱不須低

行到東城

峽裡人家近松風喧似溪暮山迷遠途行路亘高
低踏雪人留迹衝泥馬澁蹄浮生同泛梗飄泊幾
東西

望江南

欲見江南路危岑試一登江南不可見千里暮雲
層

公州客館宴集

五月江南好華亭敞綺筵風流一時盛豪傑數州
賢絃管荷香助杯盤柳影偏多余叅勝會清興欲
狂顛

陝川東軒

鞍馬驅馳髀肉銷關河千里路迢迢錦江湖水揮
鞭過星嶽伽山入眼高分陝東西皆羨郡隔雲南
北是天朝功名執掌宜吾事莫向秋風歎二毛
昏昏殘醉日曾騰過却名山訪未能不見孤雲臺
下月欲尋海印寺中僧初來太守邀相笑熟睡佳
人喚不應酒醒明朝還復興澄心樓上更先登

次明遠樓韻

未信愁腸日九迴百年懷抱向誰開江流不盡無

天去山色平分捲地來二八佳人彈寶瑟十千羨
酒凸金杯興來欲喚蘓仙起赤壁前頭醉共伺

題天安客館

雪片如手飛長安權城走馬來盤桓旅館無人坐
不寐夜深星斗空闌干孤裘薄薄紙窓鳴霜風剗
地淒以呼燈早起成小酌兩耳生熱排冬寒

用安東韻

地盡東南海一邊登臨今古幾多賢座中尤物女
中選天上使華地上仙明月似人人似月碧天如
水水如天若教艇得西施去不用區區負郭田

廣津遇風小坐江邊

日暮廣津渡長風浪似山黃頭郎倚棹白髮客憑

鞍獨鶴盤旋去羣鷗自在閑十年南北路來往亦
間關

廣津感舊遊三首

平野晚天碧半江斜日明悠悠羸馬影泛泛白鷗聲
山高黃葉落潮退白沙明何處江南客夕陽回棹聲
遙岑一點碧新月半輪明隔岸人家近黃昏笑語
聲

登毋嶽

百二山河表裡同鬱葱佳氣五雲中乾旋坤轉星
文協虎踞龍盤地勢雄百雉秦城籠近郭九重魏
闕倚長空何人解作三都賦欲效班生語未工
登木覓

漢家宮闕對南山繡柱珠簾北斗間第宅連雲皆
將相閭閻撲地摠衣冠百年文物今全盛萬古山
河屬壯觀不用登臨先作賦百壺清酒醉扶還

乘雨暮還

平明策馬去薄暮敲鐙還雨氣欲吞野日光猶漏
山風情老敵少詩興忙勝閑路逢謫仙子拍手青
眼看

驟雨

忽然何處一聲雷雲暗前山撥不開雨脚連天銀
箭立波頭捲地雪山堆漁翁船上披蓑去行客橋
邊手傘來惆悵滿園花落盡紅英顛倒撲蒼苔

暮春

寒食清明瞥眼過天時人事共蹉跎冠童何日同
沂水賢達無人似永嘉白髮刀騷能幾醉青春牢
落不成歌池塘生草方成夢老去詩情覺倍多

春雪少飲

春半如冬雪正嚴亂堆庭院到前簷誰教沽酒金
瓶盡不怕傳觴玉手纖已挽微紅回兩頰莫嫌衰
白點幾髯夜來不覺寒猶甚簾捲東風月似鑷

三月三日

浮世而今五旬二風光正屬三月三荼蘼酒熟白
新潑躑躅花開紅正酣俯仰蘭亭已陳迹風流工
部留勝談我詩欲就復誰和郊野踏青窮遠探

立春前一日夜吟

獨坐悲長夜流光苦逼人子前猶是臘鷄後卽爲
春白髮不饒貴青燈那負貧老妻頻勸酒滿酌見
情真

立春

我於百年內五十九逢春日月雙飛鳥乾坤一病
身青歸盤菜細白潑甕醪醇節物堪驚眼人情喜
得新

春日

三月東風淳似酒今朝小雨潤於膏白頭又被青
春惱紅杏花繁碧柳綠

春晚

青春一去挽難回無數飛花亂雪堆小兩池塘草

如織日長時有燕子來

三月三日二首

浮生百歲五旬五佳節一年三月三昨日香風吹
雨過桃花欲杏花酣

幾憶羲之永和會空憐杜甫麗人行踏青未得東
郊去浮白惟須北海傾

元日書懷

兒童閑事喜新年歡笑團圓聒我眠我亦少年如
汝輩如今却怕雪盈顛

除夕

古人重此夕今我病無貧賓客絕相訪妻兒惟共
親不成三夜睡且作兩年身明日屠蕪酒知應不

後人

春雨二首

好是春朝雨知時乃發生風光蓮社日節氣近清
明柳艷搖黃線梅嬌綻絳英天公方降澤吾亦恰
詩成

忽報南池漲看看綠漸生陽和方駘蕩生意自分
明柳岸搖金縷梅窓吐玉英聖君能位育天地極
財成

寒食

百六逢寒食時維二月闌榆烟應復改杏粥亦堪
餐舊習鷄兒鬪新來燕子寒名辰足可惜莫使酒
杯乾

送關西方伯

使相風流儘可誇西都自古說繁華大同江上山
如畫浮碧樓前月似波錦纜牙檣隨處樂青蛾皓
齒惱人多送君憶得曾遊地縱使重過奈老何

申相國叔舟挽八首

乾坤鍾秀氣星岳降英靈一代享公論五朝秉國衡
巖廊重八相隣閣四圖形勲業真如此煌煌有汗青
光陵挺上聖大運屬中興漢主思元亮唐宗倚魏徵
乾坤扶整頓日月佐明昇升六功臣字前編見未曾
聖主風雲會元臣柱石材胡然亡一鑑遽爾落三台
金櫃紬垂筆玉樓記已催山河應帶礪終始極榮哀
少年叨兩榜十載共金鑾久下陳蕃榻顛彈真禹冠

四佳詩集補遺二
三
敢忘傳鉢語長抱絕絃嘆墜盡情鍾淚空梁月色
寒

四佳詩集補遺二終

四佳詩集補遺三

詩類 輿地勝覽

題安山

萬里雲山似畫圖初晴物色潤於酥已憐社後開
新酒不心江東有羨鱸海近魚鹽同百越地饒杭
稻敵三吳丁寧試為田翁說欲問東家許得無

通津梁誠之大補谷別墅八詠

北山青翠四時同聳壑昂霄意未窮為有好風吹
不斷海濤聲在半空中 右北岡青松

日出雲消島嶼開鴉鬟點點翠成堆此間定有蓬
壺在鰲戴神山跨海來 右南海諸島

三峯高插玉芙蓉地闢天成造化工渺渺江湖思

魏闕蓬萊殿閣五雲中

右東望三峯

摩尼山聳碧雲端知有三清古石壇頗識閑居塵

右西拱江都

遙看葛峴翠千重寺在烟霞第幾峯老去不關名利事一窓深省五更鐘

右葛峴僧舍

桂陽秋色惱人多水遠天長月似波何處夜深吹鐵笛半篙漁艇隔蘆花

右桂陽秋月

今年禾黍足豐登何處漁村耿夜燈捻說江南秋水減白鱸黃蠓亦堪罾

右隔岸漁火

帆檣織織簇如麻租賦南方較舊多獨喜青山漕不得年年長屬野人家

右南浦漕船

廣州望月峯

長風飽帆漢水急山中歸來酒初熟枯腸得酒亦易醉雙耳鳴鳴興自足移樽飛上夢山顛偷眼東峯待新月新月澹澹生雲端冰輪無角金波纈須吏懸在天中央九州四海皆清光舉杯問月月不應顧兔笑我多清狂古人愛月皆儒仙騎鯨寥廓猶千年赤壁何時舞玄鶴伯仲豪氣天下先一樽袞袞江無窮今人古人將無同五更深深月不落四佳醉老頭半白

水鍾寺

秋來雲物易淒淒宿雨連朝水拍堤下界烟塵無地避上方樓閣與天齊白雲歷歷誰堪贈黃葉飛飛路欲迷我擬往叅東院話莫教明月恠禽啼

龍津江上古伽藍石徑崎嶇入翠杉憶昔屢邀靈
運過至今猶阻遠公談溪邊呪鉢龍應伏石上翻
經虎應叅白幟青鞋吾亦在相逢一笑虎溪南

伯仲寺

招提架蒼巘何日倒金開落葉無人掃空堂有客
來山形臨水斷水勢觸山迴坐共高僧話肯襟自
不埃

次驪州清心樓韻

樓高百尺挿雲端豪氣元龍似舊顏莫遣移舟驚
白鳥也宜柱笏看青山鶴隨明月歸天上龍抱光
珠睡水間天賜鑑湖難自料買山終欲此來閑

驪州八詠

人生百年內百年亦不滿况嬰塵網中何能任蕭
散瞻彼驪江水水清纓可漉我無適俗韻不隨時
冷暖老矣謝簪笏行與赤松伴 右驪江
少小遊黃驪四紀今轉頭登樓俯長流慷慨無時
休黃鶴去不返草萋鷓鴣洲題詩憶崔侯傑句傳
千秋君今繼家聲美名水同流 右渡舟
貝多古名藪盤鬱江之澌昔我揚帆過繫纜古槐
樹上有神仙宮下有蛟龍府緬懷雲夢藪伯仲可
誇詡我非楚醒者獨不見漁父 右八大藪
長江瀉正練一徑綠江滿我昔訪覽寺界淨非人
間燒香普濟真歲月雲長閑未結白蓮社先到靈
鷲山懷我李牧老古碣苔斑斑 右覽寺

巖以馬為名奇奇而怪怪騰驤自顧巽堅固亦不
壞海若已悻魄驚濤此崩殺我欲鞭作橋可忘砥
柱債終當鍊補大高名擅江介
右馬巖
喬山象設嚴衣冠歲寢砮茗堯余掌崗慈鬱佳氣
遍八駿嘶向前儀衛森傘扇聖王重園陵祠官肅
陳薦鼎湖雲漠漠橋首黃驪縣
右英陵
樓高清我心其下有流水綠淨不可唾可以滌心
累山川鬱相縲千里又萬里槌碎黃鶴樓此語我
曾恥豪哉老元龍舉舉統塵滓
右清心樓
使君昔未來田里不土着使君既下車豐穰烟火
夕左右殮又粥村謳雜農笛去月減官租今月蠲
軍後擊壤歌衢樽壇悌民所樂
右烟寺

利川愛蓮亭

誰續瀟溪說愛蓮名亭端合古人賢君應以德平
生好我亦虛心抵死憐結子已聞圓似斗開花曾
見大於船更須勤著栽培力風月前頭興自顛

揚根大灘

清秋昨夜快登樓小艇溪流亦自由白石前灘截
齒齒青山兩岸出頭頭柁前小坐穩於馬蓬底孤
眠閑似愁仰面龍門高萬丈又乘殘醉過揚州

揚州德海院

誰家籬落掩柴門柳暗花明又一村日暮寒驢不
知處小橋橫水月明痕
舉酒高樓一笑開青山無數蠹成堆十年空賦歸

來興白髮多情故故催

水落寺

水落山中水落寺水落石出山中暮黃鶴去邊近
青天黑雲拖屨飛白雨去年尋僧此來遊積雪滿
壑山月白今年尋僧此來遊巖畔春花欲開落去
年今年自來往山川歷歷如昨昔杖藜一枝苔蹤
滑石泉激激風生腋飯後鍾聽舊時聲壁上有詩
塵欲撲紅袖古今豈獨寇萊公我一笑王公豪氣
少三十年来始得碧紗籠

水落寺詩叙

少時讀書諸山寺往來水落山者亦再偶留
此詩於壁上計今三十餘年矣日昨一庵寺

上人騰寫來示曰得於長湍白太守口誦索
余正其誤字余於詩旋作旋棄無片言隻字
留於箱篋間况少年狂踈無意流傳安有肯
藁錄乎三十二年之事恍如夢中當時題詠
尚不得記憶又焉知誤字然一讀過押韻下
字有未盡處似是余稚過抑誦者失之姑存
之慨念疇昔能不有感乎遂賦近體六首錄
奉一庵法座下一庵時在佛巖寺距水落纔
十餘里他日相携一遊當畢其說

山中古寺昔曾遊屈指如今三十秋步履多時携
客去愛閑長日為僧留花濃竹細連幽境木古巖
回擁小樓更欲携師一歸去少年往事夢悠悠

四行言集補遺三
五
悠悠往事少年曾醉裡豪狂筆勢騰我本無心題
板壁僧偏多事寫花藤碧紗紅袖慚非分白髮黃
塵老可憎更欲携師一歸去有峯高處快重登
重登準擬最高峯歷井捫參可盪骨白日頭邊過
一鳥青山眼底戲羣龍金銀佛刹三千界錦繡山
河百二重更欲携師一歸去煮茶聲裡坐高峯
高峯落日煮茶聲偃蹇青山不世情俯視片雲平
地起仰看飛瀑半空明滿樓花雨沾衣濕欹枕松
濤徹骨清更欲携師一歸去青蓮結社送殘生
殘生結社是初心惆悵年來雪滿簪結願誰知非
淺淺入山長恐不深深蟬貂久矣無心戀猿鶴依
然有夢尋更欲携師一歸去佛巖村墅近叢林

叢林近在佛巖山山下吾廬屋數間三徑陶潛雖
寂寞一區楊老可盤桓討蕁燒筍尋常事送菊迎
梅自在閑更欲携師一歸去暮年身世共追攀

朔寧

閱盡崎嶇到朔寧棧橋冰滑馬鈴蟬江流東去無
邊白山勢址來不斷青細聽寒松送靈籟平看橫
嶂圍畫屏送君有手能盤錯春草年年遍訟庭

連川

滑滑春泥怯馬蹄揚州行路互高低大灘已怕水
猶薄諸嶺回看雪尚齊破帽輕裘增料峭宦情羈
思轉淒迷連川客館依山靜敬枕高眠日向西

正因寺

木魚有響朝岑靜石馬無聲曉寢寒珠樹鶻啼春
寂寂鼎湖龍去月漫漫

公州獨樂亭

少年聲價孰如君脚底平看萬里雲暫屈朝班還
舊隱更從榮宦策高勲功名造物真如戲出處男
兒未易論却恐鳴騶催上道北山猿鶴更移文
名園並壓錦江低我昔相尋路自迷何氏林亭知
最勝杜陵桐葉不曾題膏車恨未從盤谷雪艇終
須訪剡溪莫遣藏端仍斂霧似聞桃李已成蹊

按舞亭

按舞亭前江山好按舞亭中風月老當時按廡真
豪英酒酣起舞玉山倒風流跌宕天下先盛名自

與亭相傳後來奉使何索莫江山風月閑多年我
聞錦江賢主人改構雲物猶精神殺此風景是何
者白頭監司真惡賓昔人欲搥黃鶴樓黃鶴一怒
天公羞樓可搥兮江山風月不可搥至今千載笑
不休君不見昔時按舞亭黃金美酒白玉瓶皓齒
歌細腰舞客亦婆娑雙袖輕又不見今時按舞亭
寒叢敗葉潮滿汀禽鳥歌蛟龍舞遠山為學蛾眉
青古人今人不同時醉舞醒吟誰得之人生自可
行樂耳此外餘事都不知

公州十景錦江春遊

濯錦江邊天地春二月三月天氣新玉臺沽酒尋
芳菲遲日暖風惱殺人晴江新漲金葡萄蘭橈隨

意移畫舫杏花疎影醉扶歸玉笛山聲山月高

月城秋興

秋風嫋嫋江自波山南山北紅葉多登臨有興濃
於酥十千羨酒金叵羅黃花滿幘帽欲飲鯨吞虹
吐安足辭請君莫學宋生酸一生狂作悲秋詞

熊津明月

熊津之水清且漪熊津有月來何時百濟往事如
鳥過我問明月月應知一自樓船駕海來國社已
墟唐府開落花巖前春正愁釣龍臺下潮自回

鷄嶽閑雲

鷄嶽岩堯插層碧淑氣蜿蜒自長白山有漱子龍
則蟠山有雲子物可澤我昔試遊於其中靈異不

與他山同會作霖雨澤天下龍使雲子雲從龍

東樓送客

錦江江上錦江樓黃鶴一去雲悠悠宦遊南北知
幾人芳草別恨何年休去年相別髮如茶今年相
別白於雪江流別恨誰淺深一曲陽關愁斷絕

西寺尋僧

艇止山中古招提綠江一路高復低十載尋僧閑
往來青藤白幘雙草鞋我亦平生支許徒結社有
約何曾辜欲倩龍眠老居士畫出虎溪三笑圖

三江漲綠

三江元從銀河來合為錦水青於苔昨夜小雨漲
半篙蒲萄之酒初發醅誰家日暮三兩舫蘭棹截

四佳詩集補遺三
破桃花浪簑衣翦笠玄真子我歌滄浪欲相訪

五峴積翠

公城之勝天下甲五峴嗟峨鎮四角遙看積翠連
空濛松檜森森聳霄壑人間幾番換炎涼四時不
老唯蒼顏我欲山中斲黃精鸞笙鶴駕閑往還

金池菡萏

天孫為織雲錦機綠為裳芳紅為衣宜風宜雨又
宜月輕烟細霧香霏霏何年移自秦華顛蜜雪入
口沉痾痊雖然才大難為用何用藕大大於船

石甕菖蒲

百濟古物惟石甕腹大漢落將底用誰知菖陽天
地精開雲斲石北移種根盤九節蛟龍老性通神

靈天下少餌之可以延脩齡何用區區拾瑤草

林川題詠

見說唐兵曾駐此如何羅將苦相侵熊江一帶蕪
天淨馬邑羣峯接地陰

全義題詩

地分車峴自東西路入全城高復低山勢周遭圍
近郭樹陰繚繞護長堤

燕歧題詩

龜嶺行多險燕歧路自平山連鷄宙翠水入錦江
明有客頻來往何時了送迎淒涼孤館夜惱殺遠
遊情

平澤題詠

四佳言集補遺三
九
一壠差高四面平歸來日暮上孤亭地曾近海饒
魚鱗野已深秋足稻秔雲盡長空涵鴈影潮回古
渡帶龍腥我家數頃荒田在何日來尋白鳥盟

庇仁八景

萬里鯨濤萬里天圖南鵬擊幾三千泓深知有神
龍睡牛渚靈犀我欲然

右微茫大海

鰲岑神聳碧波中海氣昏昏盡日封最識此間奇
畫處晴能漱灑雨空濛

右隱映小島

雲濤雪浪已峻增蜃閣浮雲復幾層也識老龍三
昧法如何喚起竟無膺

右重重蜃樓

遙岑出沒白雲間鴉髻烟鬟黛色寒渺渺蒼波連
弱水此間無乃有三山

右點點螺髻

東海如今靜不波令嚴狷虎更無譁將軍高枕方
濃睡時有棘門鼓報撾

右芑營戍鼓

百年身世一羊裘欲釣金鰲釣始休半幅蘆蓑風
飽腹夕陽歸去一扁舟

右烟浦歸帆

年年三五月當空夾岸江楓樹樹紅何處仙曹拈
鐵笛夜深人語小樓中

右松坪秋月

寺在烟霞第幾岑聲聲搖月落平林悠然使我發
深省洗盡紅塵十載心

右觀寺暮鍾

海羨題詠

白馬驕嘶細柳營雄藩節度作長城閑看建纛高
秋影細聽投壺盡日聲螺髻欲浮山繚繞鯨波不
動海澄清西風吹盡綿裘薄遠客那堪萬里情

稷山濟源樓詩序

奉使嶺南也道于稷稷之客館東北隅有一樓登臨小憇問主人曰樓之名謂何主人不知問諸左右邑人曰濟源坐客不知濟源之意居正曰此邑百濟氏之故都其曰濟源者得不以百濟之源源於是乎蓋百濟始祖溫祚者本高句麗東明王朱蒙之子逃難南奔史書溫祚登負兒岳相其可居之地而都于河南之慰禮城世傳為稷山居正常以負兒岳距此可二百里安能相其可否者乎且所謂河者指何水乎居正道過此非一再而行迫未暇一入矣望見地勢褊狹無磅礴扶

輿之氣非建都之地也心竊自疑去年撰三國史節要歷考諸書稷之為百濟始都無疑矣溫王之後自稷遷南漢山城即今之廣州也後徙錦江即今之公州也又徙泗泚即今之扶餘也百濟氏自漢成帝經于唐高宗時終始凡五百餘年溫王在流離播遷之中能建邦設都與新羅高麗鼎峙為三國非豪傑英偉之才能然乎至于後嗣屢遷厥邦恃強喜戰不知唇齒輔車之勢與強敵構禍國勢日蹙加以義慈昏淫納讒者之說拒成忠之諫唐兵渡海而國隨而亡嗚呼悲哉茲登是樓不勝感慨詩以吊之

百濟遺墟草自平
我來感慨一傷情
五龍爭罷天安府
雙鳳鳴殘慰禮城
始祖祠深紅樹合
聖居山擁碧雲深
登樓多少秋風思
何處吹殘鐵笛聲

木川

宴罷西原尚早朝
木城歸路更遙遙
黑山漠漠雲遮寺
綠野粼粼水拍橋
老去頗知官况少
醒來無乃旅魂銷
晚投公館簾櫳靜
落絮飛花共寂寥

報恩

青山兩岸夾江流
野渡歸來倚小舟
幽峽多奇頻駐馬
斜陽自好更登樓
黃雲擺極稻初熟
紅錦飄零楓正愁
草草一身同泛梗
明朝又向嶺南遊

永同澄清亭

芙蓉山下鬱孤城
一水潺湲鏡面清
怕有蛟龍泓下聽
題詩不敢語高聲

黃澗駕鶴樓

黃州儘清絕
欲往更遲留
鶴去樓仍在
山高水自流
俯看飛鳥背
直上巨鰲頭
袞袞登臨興
長歌賦遠遊

忠州萬景樓

萬景高樓插半霄
登臨佳致儘難消
獺川綠接金灘去
鳥嶺青連月岳高
浩蕩白鷗盟未熟
夷猶黃鶴賦堪招
送迎南北何時了
山自蒼蒼水自遙

丹月驛

破屏孤枕短檠低
殘醉瞢騰已曉鷄
吏報五更推

戶出半輪明月老梧西

陰城

陰城是古縣陽谷淨朝暉山好屏千幅溪明玉一
園白鷗蕪水靜黃鶴與雲飛小坐林塘密從教翠
滴衣

堤川

邑古江山勝亭新景物稠烟光浮地面嶽色出墻
頭老樹參天立寒溪抱野流客來留信宿詩思轉
悠悠

栗峯驛

壠麥初胎梅已仁江南行客動傷神小塘依舊荷
花淨不見當時勸酒人

慶州十二詠

鷄林靈異

金鷄啁晰樹蒼蒼九百年來葉盡黃朴祖開邦傳
鵠祖金王納土似錢王傷心三姓皆顛蹶滿目諸
陵已廢荒千古英雄無限恨淡烟衰草更斜陽

鰲山奇勝

海上金鰲眺望宜風流文物異前時破碑或見金
生字古寺曾留致遠詩甲第有基荒齋合名園無
主短墻危春愁如許深於海鐵笛何人滿意吹

鮑亭感懷

鮑石亭前立馬時沉吟懷古思依依流觴曲水基
猶在醉舞狂歌事已非未有荒淫不亡國那堪慷

慨獨沾衣行行吟過五陵路石堡金城共落暉

蚊川騁望

行渡蚊川過別村古都遐想不勝繁鳥啼深樹思
金甲蛙吠寒塘憶玉門白乳荒唐崇像教黃童慷
慨報君冤水流不洗前朝恨蕩滌須憑北海樽

半月古城

半月城頭日欲西遠遊情思轉淒淒青浮楊麓雲
烟老黃落始林歲月迷明污村南雲渺渺興輪寺
北草萋萋百年坎軻知何用贏得尊前醉似泥

瞻星老臺

古臺牢落號瞻星遺跡依然近月城地悴天荒年
已久風摧雨剝勢曾傾孤山落日金仙影故壘悲

秋玉笛聲三姓千年曾一瞥不堪登眺更傷情

芬皇廢寺

芬皇寺對黃龍寺千載遺基草自新白塔亭亭如
喚客青山點點已愁人無僧能解前三語有物空
餘丈六身始信閻闍半佛宇法興何代似嫫秦

靈妙舊刹

舊刹岩窈接上蒼千年往事已淒涼石龕零落埋
幽徑銅鐸丁當語夕陽遺老至今談女主古鍾依
舊記唐皇摩挲短碣移時立剝落莓龍字半荒

五陵悲吊

徐伐千秋玉氣銷五陵深處吊前朝馬嘶龍誕曾
荒恠鵲浦鷄林共寂寥玉帶寶隨金橫盡銅駝影

四佳詩集補遺三
古
接石羊搖更無齒餅能傳祚春樹年年語伯勞

南亭清賞

城郭人民是又非倚欄豪嘯淡忘歸闕英殿裡龍
應去脫解海邊鵲不依羅井樹陰依舊暗竹陵筍
籜至今肥可憐當日繁華地天地無情幾夕暉

聞玉笛聲

故國興亡一笑新當時三寶盡成塵金輿自屈知
何主玉笛仍傳又幾春愛惜只堪存古物風流不
必效前人殘城落日休三弄長使英雄淚滿巾

過金庾信墓

金老墳前石獸危千年劍氣尚奇奇綸巾白羽追
前業丹荔黃蕉起後思有客題詩誇壯烈無人穿

塚近腰離天官寺古知何處萬古蛾眉姓字隨

蔚山太和樓

蔚州西畔太和樓倒影蒼茫蘆碧流汗漫初疑騎
鶴背依佈却認上鰲頭山光近接鷄林曉海氣遙
連馬島秋萬里未窮登眺興滿天風雨倚欄愁

題客館

鶴城形勝擅東南晚倚蘭舟興轉酣樓敵岳陽天
下一地鄰蓬島海中三蛟潛幽壑時時舞鴈度青
江字字涵安得長風能破浪遠遊情思滿歸帆

梁山澄心軒

蒼翠玲瓏萬竹林一軒雲物更澄心風吹細浪鱗
鱗玉月透疎簾瑣瑣金欲喚仙曹騎鶴去已將佳

句動龍吟憑欄有思無人識段段離愁夜向深

新寧縣題詠

統砌灣環小小溪萬竿蒼翠竹枝低一軒情思清
於水種種幽禽自在啼

機張

馳驅病與老相兼來坐東楹懶捲簾落日凍雲猶
冷淅微風小雨更纖纖山腰路出羊腸險浦口峯
遙馬耳尖寂寞客懷悲永夜城門鼙鼓報宵嚴

醴泉快賓樓

襄陽樓上晚風寒簾捲青山獨倚欄竹嶺天低瞻
北斗花山路出接東關豪吟轉覺江湖窄大醉從
教宇宙寬可笑功名思爛熟不知身世是槐安

龍門寺

再到龍門寺山深絕俗喧上方僧榻靜古壁佛燈
燭一道泉聲細千峯月色分居然發深省聊復喪
吾存

豐基小白山

小白山連太白山逶迤百里挿雲間分明畫盡東
南界地設天成鬼破慳

奉化題詠

蒼磴攢空樹木交兩三村屋覆黃茅居民豈識江
湖味採採山蔬具酒肴

真實嶽峴院

雲磴崎嶇石逕盤山腰有院兩三間雷聲轉壁雙

口在詩集補遺三

一六

四佳詩集補遺三
溪合雨脚連空萬木攢馬踏羊腸雲外去人看鳥
背嶂中還顧余不是風流客何事空吟蜀道難

比安題詠

雙溪合抱玉灣回公館依然島嶼開馬度翠橋黿
背過鳥飛蒼壁畫中來

禮安題詠

水複山重路屈盤飛飛紅葉送征鞍他時記我曾
遊地過却名區仔細看

龍宮水月樓

身閑不得况心閑白盡雙髭簿領間謾說青山歸
不得南來無處不青山

大丘十詠

琴湖清淺泛蘭舟取次閑行近白鷗盡醉月明回
棹去風流不必五湖遊

右琴湖泛月

烟雨濛濛澤國秋垂綸獨坐思悠悠纖鱗餌下知
多少不釣金鰲釣不休

右笠巖釣魚

龜岑隱隱似鼇岑雲出無心亦有心大地生靈方
有望可能無意作甘霖

右龜岫春雲

一年十二度圓月待得仲秋圓十分更有長風第
雲去一樓無地着纖氛

右鶴樓明月

出水新荷疊小錢花開畢竟大於船莫言才大難
為用要遣沉疴萬姓痊

右南沼荷花

古壁蒼杉玉槩長長風不斷四時香慙懃更着栽
培力留得清芬共一鄉

右北壁香林

遠上招提石逕層青膝白襪又烏藤此時有興無人識興在青山不在僧

右桐寺尋僧

官道年年柳色青短亭無數接長亭唱盡陽關各分散沙頭只卧雙白瓶

右禮院送客

公山千丈倚峻層積雪漫空沆瀣澄知有神祠靈應在年年三白瑞豐登

右公嶺積雪

水自西流山盡頭砧巒蒼翠屬清秋晚風何處春聲急一任斜陽搗客愁

右砧山晚照

密陽十景

牛嶺閑雲

牛嶺迢迢插層碧嶺南佳麗天下獨瓊樓畫棟金鰲頭閑雲繚繞長五色誰言雲是無心物澤潤生

靈元有術何曾蔽日漫遮天大旱成霖應不日

釵浦漁燈

釵浦朝來新水生碧空涵水秋夜清疎林葉盡江無風漁燈耿耿排明星野老相喚喜欲顛今年魚足休論錢白酒黃螯復相慰孤舟夜泊蘆花邊

采島秋烟

樓前十里鸚鵡洲栗花如雪香浮浮纍纍結子如繁星秋來萬斛黃金收樹杪拖白烟非烟萬家烟火遙相連大平氣象無人畫妙手我欲煩龍眠

瑩峯初旭

金鷄啁晰扶桑晨六龍扶出初日輪蒸紅開熱珊瑚光洪濤萬頃金鱗鱗須臾飛上萬丈岡一日一

周天蒼茫我欲長繩繫九鳥萬古懸在天中央

羅峴積雪

紅雲黯黯濃潑黑雪片飛飛大於席天地中間一
清氣無有一片纖靄隔由來三白瑞豐年家家白
玉千頃田遺蝗入地已千尺明年應取禾百廩

西郊修禊

春日可人温似玉西郊芳草細於織滿郊花雨紅
紛紛春波粼粼流水曲鄉隣修禊簇如雲飛觴轉
急皆醺醺風流不減永和春醉札誰似玉右軍

南浦送客

朝來小雨潤如膏官街碧柳細於綠單童匹馬雙
白瓶送客直過南浦橋人生聚散如浮雲富別貧

別皆傷神驪駒一曲歌而闌天長水遠愁殺人

馬山飛雨

東風簾捲十二欄一望眼界東南寬長林隱映浦
隔浦馬山一點青鴉鬟忽有江雲黑如茶白雨飛
飛銀箭警長風吹掃過江去半邊青山嚼落日

凝川漁艇

凝川遠從銀漢來樓前綠染蒲萄醅昨夜小雨漲
半篙漁舸隨意公流迴桃花細浪鱖魚肥盤心鱸
縷紛雪飛半酣鼓脚歌滄浪鱗臺黃閣都未知

龍壁春花

龍頭山上春正好躑躅滿山春意鬧一夜好雨如
酒醇花開已遍紅似燒誰家少年錦障泥携壺遊

賞東復西日暮歸來春滿面無數飛花襯馬啼

慶山題詠

古縣大於斗使君才似江賢名曾第一治化定無
雙山色濃低檻秋聲細入窓斯文佳會盛題詠筆
如杠

河陽聳碧樓

望中飛鳥入雲遙樓在虛無插半霄壯節脩篁千
玉槩纖腰弱柳萬金條晴川句好今安在孤鷺才
高不用驕俯仰登臨多少思半山飛雨又崇朝

開寧扶桑驛

亂山歸路互高低行到扶桑正午鷄雲度小風高
嶺北雪殘流水斷橋西光陰送旅身如寄羈宦他

鄉思轉迷自笑詩狂猶古態壁間重檢古人題

泗川

南來無處不清遊隱映鰲岑近海頭孤島烟橫深
水晚荒城日落角山秋驚濤夜撼蛟龍窟殘雪香
番橘袖洲珍重斯文揚太守一樽談笑亦風流

金海金剛社

歷盡名區信馬蹄盆城城北訪招提金官故國乾
坤老玉輦曾遊歲月迷始祖陵深山寂寂將軍樹
老草萋萋伽伽古物琴猶在要遣佳人唱更低

首露王陵

金陵往事與誰論千古猶存首露墳龜背曲亡人
不見伽伽琴在妙堪聞銅駝故里山如戟翁仲遺

墟樹似雲百六十年能享國可憐荒穰幾斜曛

昌原將星樓

第一南州蛤浦營明時節制盡豪英三千貔虎金
蛇陣百二山河鐵甕城民樂羽毛欣有色令嚴士
馬寂無聲將軍已熟籌邊略手挽天潢洗甲兵

固城樂悅亭

小島截入滄海濤萬竹如束青沉沉行穿萬竹坐
盤石一洗萬古塵土心扶桑初日紅珊瑚波濤萬
頃鱗鱗金雪中黃橘垂繁星飛來忽有雙翠禽且
問何處有丹丘三山咫尺金鰲頭欲招子晉騎笙
鶴十二洞天窮清遊下遊九州復九州蠖蠓人世
三千秋

題客館

關河渺渺鴈南征行遍天涯到鐵城並水山形隨
地盡漫空海色近人明

鎮海

粉堞嵯峨鎮海邊新樓斗起鳳孤鶩鴉鬣點點呈
羣島鯨浪鱗鱗帖一天日落漁村閑占月潮回塩
竈煖生烟悠悠遠客多情思徙倚欄干眼欲穿

益山

南湖白白益山蒼往事微茫夢一場濟國遺墟空
老樹箕君故殿幾斜陽百年無語憐金馬萬古多
情記石羊白髮遠遊多慷慨登臨無處不傷神

萬頃

澤國風烟異故鄉
羈懷宦况共茫茫
青山斷處地應盡
白鳥去邊天更長
晚雨來時雲似
茶夜風吹盡月如
霜小樓一夜涼如
水清瘦年來倍沈
郎

金溝

日暮倚樓處
行藏問草堂
有詩花滿徑
無夢草生塘
高樹留殘照
虛簷逗晚涼
海山尖似劍
端可割愁腸

扶安

天街小雨又崇朝
誰撚黃金染柳條
洞壑清風生遠籟
海門殘月落寒潮
一樓岑寂宜高枕
古渡荒涼只卧橋
隨處江山堪作賦
多慚拙筆竟難描

龍安

縣大大於斗
客多多似雲
納涼開北牖
岸幘倚南薰
遠岫鴉鬟細
前溪燕尾分
吟詩無好語
酒可策高勳

送靈巖李使君

似說黃原鎮海隅
送君今復佩魚符
德津水淺橋猶在
道岬碑殘字半無
梅塢早花翻雪萼
竹林新筍長龍雛
白頭辜負遠遊興
誰寄湖南著色圖

濟州題詠

雪滿花間鳴翠鳥
霜深籬落熟黃柑
雲開蓬島鰲岑近
日出扶桑海氣涵

順天燕子樓

鵲兒嶺外一葵樹
燕子樓前八馬碑
白髮孫郎人

莫笑牧之曾賦子枝詩

樓外年年燕子飛樓中好好已成非風流人物今
安在一曲琵琶伴落暉

昔太守孫億眷官妓好好按部重遊好好已
老通判張鑑有詩曰霜月淒涼燕子樓郎官
一去夢悠悠當時座客休嫌老樓上佳人亦
白頭

豐川八景詩并序

豐之山水之勝為關西之最西河君任公元
濬以府八詠索居正詩余惟古人云人傑地
靈蓋地靈則人必傑人傑則地尤靈萃於尹
涓於呂隆於孔明瀨於嚴光昌黎之於退之

夔州之於子美眉之於蘇涪之於黃滁之於
歐皆以人而地尤靈然其傑未必非地之靈
也任氏自高麗侍中子松大振家聲世濟其
美今西河擢大魁圖麟閣登岩廊有子若孫
俱顯當世其以地而人亦傑可知不揆鄙拙
書八絕為題詠張本云

海上鰲峯聳碧簪閑雲漠漠弄輕陰當春好作知
時雨似是無心亦有心 右椒島春雲

風恬浪靜秋月明大地山河無盡清波底也知珠
有淚故應喚起睡龍驚 右業青秋月

方塘上下碧漣漪紅藕繁開又一奇採採有時搖
畫艇何人解唱若耶詞 右雙池菡萏

誰撚黃金萬萬縹春風多事弄嬌天縱然吹作狂
顛絮慎勿風流學女腰

右一徑楊柳

縛石山前雪勢稠青娥一夜白渾頭想知曉起詩

成處銀海花搖凍玉樓

右縛石積雪

寺在寒山第幾層鐘聲和月曉風澄聞來自可發

深省詩有何人似少陵

右清涼曉鐘

山深祠邃且神明多少居民苦乞靈靈亦年來應

自愧瘡痍何事未全醒

右望德靈祠

古樹槎牙閱幾春年來皆作老龍鱗故家文獻今

猶在又見龍頭第一人

右環館喬木

平海八詠

海棠岸

金鰲頭戴山重重兩岸夾走盤青龍一夜光風吹
嫋嫋海棠開遍紅鬢鬆誰家幽賞駁馬嘶落花狼
藉翻雄蹄鷓鴣飛來不驚去日暮更上梢上啼

越松亭

平沙十里鋪白罽長松攬天玉槩細仰看明月黃
金餅碧空如水浩無際客來一捻吹洞簫風流盡
是神仙曹我欲從之譙瑤池飛來青鳥啣碧桃

鳥道棧

蒼崖萬仞臨海堤鳥飛不度青天低縈紆一棧細
如縷丹梯十二勤攀躋行人失脚馬頰僵危於漚
湏高太行君看宦道多覆車人間無處非羊腸

鯨波海

天地之鉅海為最其環無際亦無外由來觀海難
為水眼高四海如許大我欲試往仍丹丘睥睨三
島戲十洲待見桑田潮亦至煩君為我添一籌

臨漪臺

臨漪有臺高嵯峨蛟龍熟睡鯨無波扶桑咫尺出
紅日金濤鬧熱蒸晴霞雲間掩映見仙島琪樹瓊
花長瑤草曾聞有棗大於瓜擬訪安生事幽討

望槎亭

望槎亭上神仙家望槎亭下魚龍波銀潢一帶接
溟渤渺渺秋風犯斗槎一自博望尋靈源至今來
往皆神仙歸來乞我支機石我欲為鍊補青天

通濟菴

懸崖百丈如削鐵上有黃金一寶刹十笏禪房深
復深松濤萬壑洒晴雪一點紅塵飛不到俗客由
來迹如掃芒鞋竹杖欲歸去白雲滿地迷海嶠

湯沐井

六鰲負嶼山高掀九龍護井通靈源湯泉溢溢盎
似春鬼神呵衛無埃氛聞說一勺沉痾痊輸以兩
腋骨亦仙我今詩酒成膏肓欲往快雪仍痛湔

送閔貞赴任原州

雉嶽山中讀書寺少遊歷歷記前時法泉庭下詩
題塔興法臺前墨打碑當日行裝驢不滿至今歸
路夢先知白頭未遂重遊興送別悠悠攪我思

鐵原

國破山河作一州
泰封遺跡使人愁
至今麋鹿來遊地
依舊魚龍寂寞秋
斜日淡烟天共遠
落花飛絮水同悠
當時鏡識歸真主
可笑弓王事逸遊

戊戌秋九月 居正受 中宮胎室證考使兼

安胎之命卜地于醴泉之龍門洞未幾仍命

臣居正為本道巡察使歷諸州五旬之間四

到醴泉今又宿多仁縣太守陳公克忠少年

執友鄉人孫公次綱戊午生負同年也相與

話懷仍成數絕非以為詩聊志歲月云耳

古說襄陽天下奇
今時人物似前時
太守清德知何處
他日須看墮淚碑

右 上陳太守

孫郎老不遇知音
慷慨時成白石吟
世事蹉跎君不說
一樽相對百年心

右 上孫同年

當年戴鳳倪天祥
胎室仍安瑞更長
麟趾螽斯方有慶
比鄉終作帝王鄉

右

陝川澄心樓

關河路綿邈
歲月日侵尋
袞袞登樓眼
悠悠倚柱心
山回青嶂合
洞密白雲深
更有澄心處
寒溪觸石吟

四佳詩集補遺三終

